

PALEMENE IX
1985-1987

Afioga Hon VAAI KOLONE:



Itumalo Faaalaalafaga:

Vaisigano Nu.1

Filifilia:

31/12/85

Tofia ma Palemia:

31/12/85

Faatauto:

31/12/85

Uluai Lauga faa-

Palemia:

31/12/85

Lau Afioga i le Fofoga Fetalai ma le mamalu o le Maota, atonu o le a fai ni ou manatu ae le umi. I lenei lava taeao tatou te ave pea le mua i le Atua e pei ona e siitia le faafetai. Sa tofafa ma matou momoe, taitaiina mai le soifua ua tatou aulia ai lenei taeao fou i le manuia. Ua toe o ni nai itula tatou taunuu i le Tausaga Fou.

O le paia o le atunuu ma le tapuaiga atoa i le tausaga a mavae nei, ua malo le tapuai. I lau Susuga i le Ao o le Malo, lau Susuga Malietoa ma le tapuaiga, malo le tapuai. Lau Afioga i le Tama a Aiga, Mataafa malo le tapuai. Pule ma Tumua, Aiga i le Tai ma le Vaa o Fonoti, Aiga ma latou Tama, Tama foi ma o latou Aiga, ua malo le tapuai. Ekalesia, o e o latou aumaia le feau o le Tala lelei i lea taimi ma lea taimi, o lo o maua ai le agaga toamalie. Samoa i Sisifo, faafetai i la outou fai tatalo Samoa. E ui lava ina lutia i le fesouaiga o matagi sa le mafai e na matagi malolosi, ona aveeseina Samoa mai aao alofa o le Atua.

Faamalo i lau Afioga Tofilau ma le Kapeneta, faamalo i le Maota atoa. O le tulai mai i na tausaga ma lou faafoeina o le atunuu, malo tautai, malo taumafai. Ae pei lava foi o le upu e masani ai i so o se mea lava e tatau lava ona i ai se maumau i so o se faiga malo lava i lou taofi i so o se mea lava i le lalolagi nei, e tatau lava ona i ai itu e lua. Ae ui lava i lea, e le tulimataia itu vaivai, ae ao ona tulimatai itu taua o galuega taua ua faia, faamalo lau tofa le tofa a le Kapeneta malo le lagolago. Afai foi o le a ni eseese ua tatou i ai, leai tatou te eseese pea i manatu, i la outou tofa. Ae tasi pea le mea o tatou taulai i ai ina ia manuia Samoa mo a taeao. Ma ou te talitonu o lea foi tulaga atiae ese lo outou finagalo, ese le tofa a lenei itu. Ae ui i lea, o lo o i ai lava le na te tautai le Maota o Samoa, na te faatonutonu la outou tofa ma ni o matou manatu ina ia manuia Samoa mo a taeao. O a ni faaletonu i le tausaga ua tuanai atu, tatou fultua i ai. Tatou savavali punouai mo le lumanai. Ia o au upu e le o toe mamao ae tatou taunuu i le Tausaga Fou, tatou faamoemoe ia ina ia tatou aulia le Tausaga fiafia ma le manuia. E leai se Tausaga Fou faapea o le a fou, o le a fou i ai ni aso ae peitai, e fou ni faiga. Atonu e i ai ni faafitauli o le a tutu mai, aumai le faatuatuaga i lenei itu o le Maota, lau Afioga Tofilau ma lenei itu faapea le

atunuu, lafo mai le tou avega i lenei itu. E leai se malosi e leai se poto po o se tomai, ae faalagolago pea i meaalofa a le Atua e aumai i le tagata e musumusuina ai le tofa ina ia fai ai mea aoga mo Samoa a taeao. E pei ona ou fai atu, o le a le umi sau faamatalaga. A o le mea e i ai, tau lava ina ia aulia e Samoa atoa, amata mai le Ao o le Malo e oo atu i tagata, le paia o lenei Palemene ina ia tatou aulia atu le Tausaga Fou i le fiafia ma le manuia. Ia soifua.

Afioga AEAU PENIAMINA LEVAISEETA



Itumalo Faaalaalafaga:

Falealupo

Filifilia:

19 Mati 1985

Faatauto:

31 Me 1985

Lauga Faataupou:

4 Iulai 1985

Lau Afioga i le Fofoga Fetalai o le Maota, lau Afioga i le Palemia, Minisita o le Kapeneta ma sui usufono mamalu o le Palemene. E ia te a'u le ava e tatau ai ou te tulai atu ai i lo outou mamalu i lenei taeao. Ua i luma o le Atua la tatou faafetai ua molia e ala i le talosaga na tuuina atu e le Afioga i le Fofoga o le Fono. Tau ia ina faafofoga le Atua i le taulaga ua molia ma le faafetai ua siitia ona ua maualuga le aoina o le masina i le tatou Palemene.

O taeao faapenei a'o sauni mai i lenei Maota Fono e pei e moe ae le ma moe, ta te tu foi ae ta te lili'a aua ua pa'u le mea nei. Ae leitioa aua ua ou toe tomanatunatu i taeao o le Atunuu ua mavae i le tau afua mai o le sailiga Malo ma le Faigamalo. Ua Momoemausu le tamaloa o le Alataua ae Moeloa le tamaloa o le afioaga o le Taitai o le Malo. E Moefeliuliuai ma Moemanatunatu le tamaloa Aana, ae Moeonono le Matua o Sa Fenunuivao. E Moefaauouo le tamaloa Lufilufi aua Tumua, ae Moefitifiti le Malietoa ina ua 'i'ite ona tino. Se o pāpā uma o Samoa lale ua i Falealupo ia Nafanua.

Na tulai Malietoa e alu e su'e, alu le malaga e saili so la Malo. Le malaga lea na taiala ai le tiotala. Fai mai Nafanua, "A oso le la i Mataseu ia e goto mai i lo'u nuu. A oso le masina i Pomasa nei, e goto mai i Fili ma Puletuu. Malietoa, ua ou iloa le ataata loloto o le la ma o le a i ai se malosi fou o le a tulai mai. O le a le toe i ai ni taua ma ni fevaevaeai, ae na o le alofa o le mea sili lea ma le fealofani. Ia tali i lagi se Ao o lou Malo". A lea na molimauina i Sapapalii i le lima tausaga talu ai; na molimauina i Manono ma Aiga i le Tai i le vaiaso na se'i mavae atu nei i le 150 tausaga talu ona taunuu ia valoaga a le tamaitai o Nafanua.

Ua oo mai le Malo ua suluia ai Samoa, ae agiagia ai i Mulinuu nei i le aso 1 Ianuari 1962 le Fu'a o le Saolotoga. Ua fanau lo tatou Malo Tutoatasi, ae avea ai Lana Afioga Mamalu O Le Ao o le Malo lea na valoia le

Faavae o le tatou Malo Tutoatasi. O le Malo ua le toe i ai ni taua, o le Malo e le toe i ai ni fevaevaeaiga ae na o le alofa ma le filemu ma le fealofani lenei ua tatou sapi ai nei. Ua tatou 'oa'oa ai nei i Faleseu ae sa'o i Maauga. Ua afifio mai Tupu i Tiafau nei, afifio mai Tamalii, maliu mai Ponaoo o Tootoo; o Tulatā ma Tulatoa o Samoa o osana i le Palemene o Samoa. O Tiafau o le Malae e o mai i ai Aiga e fau ai Tia. O le Malae o le Faautugatagi a Samoa, ua ofaga nei i ai la tatou Palemene. O sui filifilia uma mai ia Pule ma Tumua, Aiga i le Tai ma le Vaa o Fonoti. E aiffio mai e a? E opogi. E maliu mai e a? Ina ia fau se tatou fale e tū matilatila, o se fale o Manaia, e lelei ma ia maopopo, ia mautū, mamalu ma ia matagofie. Ia matagofie e le gata i le silafaga ati a lo tatou Matai ae faapena foi lafanua nei, a'o Samoa uma o lo'o talafaauto i so'o se itu o le kelope, o lo'o susu'e o latou faamalama ma tilotilo mai pe faape'i le fale o Samoa, le Palemene i Tiafau nei. O se fale e tatau ona tele sona faapaologa e sulufai mai i ai le Atunuu, ae fanau atu ai i inei mea lelei ma mea taua e faatautaia e lo tatou Atunuu. O se fale e fanau atu ai se Malo e pei ona valoia, e le toe i ai ni taua, le toe i ai ni fevaevaeaiga ae na o le alofa, filemu ma le fealofani.

Lau Afioga i le Fofoga o le Fono ma le mamalu o le Fono Aoaio Faitulafono, ona o se matou taeao muamua ua tatau ai foi ona afea i so matou leo. Sa matou tomanatunatu i tama o le Atunuu, Taitai o le Atunuu sa latou tauasaina le Malo Tutoatasi. I latou ua taoto mai Tia, ua fai i lagi le tuligasi'a a Samoa, le Afioga Tupua Tamasese Meaole, Afioga Tupua Tamasese Lealofi IV, Afioga Mataafa Faumuina Mulinu II ma le Afioga Tuimalealiifano Suatipatipa I. O i latou o tama sa latou o ifo i lalo ma tatou galulue faatasi e saili so tatou Malo. E le gata i lea o i latou o lo'o tatou galulue, o tama o le Atunuu ia atagia pea o latou foliga i totonu o le Maota Fono lenei. Aisea? Aua e oo mai i le taeao lenei o lo'o sologa lelei tualumaga a le Maota o Samoa. Lau Susuga i le Tapaau Faasisina, Malietoa Tanumafili II, lau Tofa Tupuola Efi, lau Afioga i le Aloalii Vaai Kolone ma ē o lo'o seei nei i le Sa o Samoa. Lau Afioga i le Tootoalii Tofilau Eti Alesana, ua faamalo le fai o le faiva. Ua malie ō, malie malo. Malo le fai Malo lelei. Ua papale mai Tamalii ma Failauga tatou te galulue faatasi. O le tapuaiga a le Atunuu o lo'o lafo mai lea. E le gata i lea, o sa matou faafetai aua e i ai le talitonuga, o le sologa o le filemu o lo'o aui ai lenei Maota i finagalo ma talosaga a le Auaifaluga Paia a le Atua o lo'o talafaauto i lo tatou Atunuu, ia latou talosaga i le ao ma le po ina ia foai ni manatu lelei ma se tofa mamao i sui usufono filifilia o le Palemene, sui ua fā'ia mai i le fuifui se'i o tatou lalago faatasi ma saili se manuia mo Samoa mo a taeao. Ia manuia le tatou Palemene, manuia lau Afioga i le Fofoga o le Fono, le Taitai o le Malo, le tapuaiga a le Atunuu. O le tatou galuga lenei o le tatou Paeaiga lenei, pe tua ma ni ā, tau ina faatasi mai le Atua ia maua so tatou 'ai. Ia uma atu le tatou Paeaiga ma toe suia mai, ia viia le Atua i mea tatou te faia.

Ona liliu mai lea lau Afioga i le Fofoga o le Fono ma le mamalu o le Palemene i sa matou lafoga laitiiti e tusa ma le tanoa pa'ū i le saunoaga a le Taitai o le Malo i lenei taimi, e momoli atu ai le faafetai tele ona o se fesootaiga vavalalata ua faaali mai e le Taitai o le Malo ma la outou Aiga Kapeneta, ua malamalama i ai le Maota Fono lenei i tulaga o le tatou Malo i le afa o lenei tausaga muamua. O lo'o faamamafaina i se tasi o vaega o saunoaga i le tatou Pepa lenei le atiaeina o le Malo o lo'o i ai nei ni fuafuaga a le Malo. Ua tulai mai se tasi o ia fuafuaga, ua aliali mai le Malae Vaalele ua toe nei o se aga le faamoemoe ona tatalaina lea. Aua o fuafuaga uma ia mo i latou o le a tafafao mai ia lava taoso lo tatou Atunuu i ia mea e pei o auala, aua e tatau ona faaleleia auala ma fale e o mai i ai i latou. Ia atoa foi ma se tasi o faatosina e aumai ai i latou mai fafo, o a tatou meatotino po'o faavavau a le Atunuu po'o vaaiga i mea o aso anamua a lo tatou Atunuu.

Ou te fia tautala i le auala lea i Falealupo aua a tatou fuafua i ai, e tofu lava afioaga latou ma nai sao e faaali ia i latou mai fafo. Atonu e faapea mai le toatele ua fia oo tele i Falealupo, a'o le faalavelave e le o le mamao ae ona o le leaga o auala. Ae se'i silasila foi lau Afioga i le Fofoga Fetalaia ma le Minisita o lo'o fitoitonu ma lenei mataupu, o le auala lea i Falealupo o le ala tuu ao le alafua. E le se ala foi na o Falealupo o le ala mo Samoa uma le ala lea. A foi o le ala lea na aumai ai mea tetele e ui mai i le ala lea, aua la tatou te toe faagalagalo i ai. Aua o le mea lea na sese ai, o le alu atu o le auala lea na fuafua, ua le alu i tai i Falealupo ae ua alu atu i uta i mauga, ona umi ai lea o le ala lea agai i tai. Ona pau lava lea o le afioaga ua alu atu le auala alu i uta ae le alu i tai. O le auala lea e toatele i latou - o le tausaga lenei e toafitu i latou na malaga mai Tutuila e fia vaai tonu i Falealupo, a'o le faalavelave o le leaga o le auala. Ou te talitonu o i ai foi faavavau a le Atunuu po'o vaaiga i mea o aso anamua e tatau ona faaleleia o atinae uma aua turisi ma o se mataaga tele. E tele foi afioaga o le tatou Atunuu nei e fia silasila i ai, a'o le leaga o auala. Faata le auala lea aua o le tasi lea valoaga na i ai i lena vaitaimi. Falealupo aua tou te popole o le a i ai se aso o le a o mai ai ni perofeta e toe faaleleia auala. O lea la ua i ai nei le perofeta e toe faaleleia le auala. O lea la ua o mai nei Perofeta o Mose ma Arona, o Mose o Tofilau Eti Alesana ma Arona o Siaki Netzler. O laua ia o le a faataina le auala lea. Ou te talosaga atu mo lea lava tulaga.

E le gata i lea o le faaleleia o atinae i le vaomatua e pei ona taua i lenei Lipoti, e talosaga atu ina ia faapea ona faia. E ala lava ona faa-faigata galuga o matou e tele fanua, a'o le leaga o auala ona e leai ni o matou auala galuga e faataunuuina ai polokalame ina ia faafaigofie ai. Ou te talitonu ua saunoa le Afioga i le Minisita a maea loa le malae vaalele i Faleolo, ona amata mai loa lea i le faasiusuga o Savaii le faataina o auala ma faasolosolo mai ai i Apia.

O se tala i moli o lo'o i ai lava i totonu o le Lipoti a le Afioga i le Taitai o le Malo. O le tasi lenei mala o lo'o tupu mai i le alu atu o le auala i uta ae le alu i tai. O mea ia e alu faatasi ma le alatele, o vai ma le moli. Po'o fea lava le mea e alu i ai le alatele, e mulimuli mai ai lava le vai ma le moli. Ua alu atu nei la le auala i uta ae tu matou i le faaletonu. O lea la e tatau ona se'i silasila totoa o le a mu uma lava nuu, ae oo atu i tai i Falealupo ua leai se moli o i ai. A faapea la e mamao po'o Arapi po'o Initia e aumai ai se isi afi (generator) aua o le tiute lea o le Malo ia laugatasia uma, ae le faapea e maua le isi nuu ae le maua le isi. Ae a pe a aumai se afi lelei faitalia matou ma vaavaai ae faatupe atu e lo tatou Malo?

O sa matou tala i le atinae lenei o le suavai. O se tala lenei fai mai la'u uo toeaina, "Aeau", vaeane le upu e to ia te a'u, "O le mea o lenei e faamole manava". O se tala faanoanoa lenei i lo matou nuu. E selau ma ona tupu aiga ae leai se aiga e leai se paipa. Ae tiga lava ona leai se vai ae fiafia lava tagata ma soifua lelei, ai o le lelei o le ea i Falealupo. O le vai ma le taumafa o mea e manaomia, e lelei foi le taumafa aua e o mai lava faisua latou, e tele foi le ufi. A'o le isi la mea lea e manaomia mo le soifua maloloina o le vai. E leai se aiga e leai se paipa ona ua alu atu le faasalalauga e fai paipa. Ae i ai le mea o lo'o tupu, o se tala faanoanoa e leai ma se aiga o i ai se paipa e mafai ona taumafaina ona e maua tele le tulaga o le masima. O se faanoanoaga tele lea aua a outou affio atu e pei e foliga lelei pe a i ai ni taligamalo, ae a outou taumamafa i vai ona faafaigata foi lea. O le talosaga faafetai i le Afioga i le Minisita ona ua amatalia nei le tane tele lea ua manaia, pau lava le mea ia oo atu a tatou paipa ia i tai aua ua atoa nei le 7 tausaga o taatitia ai. Ma le faaaloalo lava.

Ona oo ifo lea o so matou leo i le Lipoti o lo'o taua ai Matagaluega a le Malo ma ana Faalapotopotoga. O Matagaluega a le Malo ou te talitonu i lona lava faatauaina o le Matagaluega po'o le aufaigaluega a le Malo. E i ai lava le talitonuga toatasi o le Tootoo lenei, e le o le toatele o le aufaigaluega e lelei ai galuega aua o le tiute lea o le Malo, ia silasila totoa ma faatino ia lelei galuega a le Malo ae le o lelei. Ou te le iloa lava se Matagaluega o atoatoa, e toatele o lo'o i ai, e le o le toatele la e mafai ai ona lelei le faatinoina o galuega a'o le lelei o totogi, ae aua le faatoateleina. E le faapea a toatele ona faatele atu ai lea ma totogi aua e le fetai. O le taimi lenei pau lava le mea e faapea a toasefulu o lo'o faigaluega i se vaega o le Matagaluega e tatau ona aveese le isi toalu ae ua lava le toavalu, ona toe asi mai lea i le isi fa vaiaso poo a mai galuega. E asi mai i le fa vaiaso ua matua sili ona leaga. E ala ona leaga ua faalilii le toavalu lea ina ua aveeseina le isi toavalu, o le mea la e tatau ona fai, tutuli uma le toavalu lea ae avatu le isi toavalu fou, e toe asi atu i le isi fa vaiaso ua matua atoatoa lelei. O se faataitaiga, e le o le toatele o le aufaigaluega e lelei ai le faatinoga, a'o le lelei o totogi ae toalaitei.

O le isi itu i le aufaigaluega a le Malo o se vaaiga faanoanoa, aua e tofua tatou ma taimi tatou te asiasi ai i ai. O le mea lenei o le va fealoai (public relations) i le taliaina o le mamalu o le Atunuu atoa ma nisi mai fafo. O se vaaiga faanoanoa aua e foliga mai ai i ina le maualalo tele o le tulaga o aoga o lo'o i ai i so'o se Matagaluega lava a le Malo aua e le o silafia mai e le Minisita po'o le Taitai o le Matagaluega. O nisi o i latou nei e o atu lava tagata a'o la lava e tutu, feoa'i ma tali'e e pei lava o o latou aiga, e talatalanoa lava e le amanaia mai tagata nei, e le saunoa mamalu foi i le mamalu o le Atunuu. O la'u lea vaai i aufaigaluega, se'i toe silasila totoa Taitai uma o Matagaluega ina ia faaleleia lea itu.

Lau Afioga i le Fofoga o le Fono ma le mamalu o le Palemene, ou te talitonu o le a toe maua se isi avanoa e toe avatu faauma ai sa matou lafoga. I lenei taimi ma le faaaloalo lava, ia manuia lava gasologa. Ia manuia lau Afioga i le Fofoga Fetalaia, faamalo le faapale ma le onosai, leitioa leaga o oe o le Tiakono Toeaina. E ui lava i mea uma ae ua tu soo atu le sui usufono mo Falealupo. Ia manuia lau Afioga i le Taitai o le Malo, manuia a outou Afioga i Minisita, le Palemene tainane o le paia o le Atunuu. Faafetai.

Afioga AIOLUPOTEA PALEMENE



Itumalo Faaalaalafaga:

Palauli

Filifilia:

1 Mati 1985

Faatauto:

19 Mati 1985

Lauga Faataupou:

2 Iulai 1985

Lau Afioga i le Fofoga Fetalaia ou te muamua ona ou faafetai atu ona ua tafa foi lou finagalo e faatatau i le viliina o lipoti mo i matou nei o Sui fou. Ae o lo o tuliloaina lava le tulaga taua o le iloiloaina lea o lipoti e pei ona faataatia i luga o le Maota Fono i le taeao nei. Silasila foi, o le tasi foi lea o mea e pei sa aafia i le saunoaga a le Afioga i le alii Palemia i le taeao nei, o le fia maua atu lea o ni fautuaga i le atunuu, e auala atu i Sui mamalu o le Palemene, e faatatau i le fesoasoani ai i le tausaga o tulaga faavae ma le agai i luma o le tatou Malo, aemaise ai i nisi mea. O lea la i lou taofi faasui Usufono, e tele ni mea aoga e mafai ona tuuina atu ai ni fautuaga e auala atu i lipoti nei. Ae afai nei o le a faatino tamoe e pei ona i ai lau faatonuga i le taeao nei, e leai se suesuega maeaea. Ma atonu foi, o le a leai ni sao taua e tuuina atu faa-fautuaga po o nisi lava uiga faapena, aua ni lelei o Matagaluega ma ni fuafuaga a le Malo mo le agai i luma.

O lea lava la e valuvalusia ai aa o le fau, e pei foi ona saunoa nisi Sui i le taimi ua mavae. Afai ua lafo mai le avega tatou te faia, e ao ona tatou fai toatoa ma fai maeaea. A o le tatou tuli tamoe ma le faatopelau

faapenei, ia ou te taofi lava, e le i oo ina maua ai le maopoopoga o tulaga maeaea o se manatu e faaalua e faatatau i lipoti nei. Ma o lea la e toe fia tuuina atu ai se isi talosaga, e auala atu e pei ona mafai ai ona susesueina ai nei lipoti taua. E matua taua tele nei lipoti e pei ona tuuina mai ai foi ii o lipoti tau le Faletupe ma mea tau tupe faapena, e ao lava ona maua sina avanoa e Iloilo ai.

O lona uiga i lau Afioga, o le avanoa lenei e talanoaina ai le lipoti? Lau Afioga ou te fia tautala puupuu ai la i le lipoti.

Ou te fia faatu atu la le lafo, ina ia talia le Pepa. (Faaluaina e Aualitiia Pinati le lafo).

O le tasi lenei Ofisa taua tele ana galuega i fuafuaga a le Malo, faapea foi i Kamupani ma Pisinisi, ina ia maua lava fuainumera aua le taumafaiga ma le faataotolia o polokalame mo le agai i luma. Ua ou matauina la le parakalafa 2(2), o lo o taua ai le tulaga i le aufaigaluega; ma o lo o faapea mai. Ua tolu nei ni tausaga sosoo mai lava e le o maua le numera faatulagaina a lenei Matagaluega i tagata faigaluega. Ma ua faapea mai foi se isi vaega i le faasologa o le lipoti lenei, ua mafua foi ona le maua ma le avanoa nisi mo le auina atu i fafo, m o le aoaoina faamasani atili, ona o le toagaogao o le aufaigaluega, aemaise lava i e tulaga sinia po o e maualuluga. O lea ou te fia fesili ai i le Minisita o lo o faafoeina le mataupu lenei, pe faamata ua i ai se isi suiga i le taimi nei e faatatau i le aufaigaluega lea? E aliali mai e toaiva e le o maua ai le numera faatulagaina. Ona o lea ua aliali mai i saunoaga a le alii Palemia, ua tulaga lelei le tamaoaiga. Ua tataua ona lava ni tupe e mafai ai ona faafoeina ai nei polokalame, ina ia maua pea le sini o le faatulagaga ma ia aoga ai, ma maua ai ni fua o le galuega i le faagasologa o lenei Matagaluega ma ana galuega fai.

O lona lua o fesili lau Afioga i le Fofoga Fetalai, o lo o i ai lea i le parakalafa 4 ma le 3. O lo o taua ai e faapea, o le isi vaega lea o le (Cartography - Vaega Tusi Faafanua). O lo o faapea e lua ni alii Ofisa o lo o totogiina mai, mai se teuga tupe tuufaatasi a le UNPFA ma le UNTCD o latou totogi. O le maga muamua o lau fesili, po o aafia le toalua lea i le 32 lea o tuu mai o le lisi o le aufaigaluega? Ma po o aafia ai foi i le vaega lenei? Pe faamata la afai e le o aafia ai, o le mea lenei e fia manino ai lou tootoo.

Ma o le lipoti foi o lo o faapea mai, e i ai le faamoemoe e ono fia tuu ane le toalua lea i totonu o le lisi masani o le faasologa o le aufaigaluega i le Matagaluega. O lea la e fia fesili at ai, pe faamata afai e tuuina ane laua ia, o le a tauaveina e le Malo ia le tulaga o totogi ma itu faapena.

O lo o taua foi i totonu o le faagasologa lava o le lipoti lenei le parakalafa e 6, ou te fia faasino atu ai i lau Afioga ma le alii Minisita e faatatau i le faafitauli e taua o le auala faakomepiuta (Computer System). Lea faapea e i ai le isi tausaga sa iva masina sa tuai ai ona aumai ai i luma numera ma faatulagaina. Afai o se tulaga faapea lau Afioga i le Fofoga Fetalai e faatuai faapea, o lona

uiga o ni fuainumera le faatuatuaina ua tele ina aumai i luma, pe afai e le o maua pea i taiai uma le tulaga o le faamaumauina atoatoa o nei fuainumera. Ma o le tulaga lea i nai fesili e fia tuuina atu i lenei taimi ma le agaga faaaloalo, e faatatau lava i le Matagaluega lenei. Faafetai

Afioga AIONO FANAIFI



Itumalo Faaalaalafaga:

Aana Alofi Nu.1

Filifilia:

2 Mati 1985

Faatauto:

19 Mati 1985

Lauga Faataupou:

5 Iulai 1985

Ua malele le taulaga na siitia e lau Afioga a le

Fofoga Fetalai. Ma e talitonu lou taofi o lo o faafofoga pea le Atua i saunoaga ma finagalo momoli o lenei Palemene, ina ia manuia ma sofiua Samoa. Ou te tulai atu ou te fia tautala i le tuleiga faa-Minisita a le Afioga i le alii Palemia.

Ma e amata sau faamatalaga i se fesili e ala atu i lau Afioga i le Fofoga Fetalai, i le Taitai o le Malo. O le fesili - po o le a ea le mafuaaga ua le mafai ai ona fesootai ia le faagasolo atu o le manuia o le tatou tamaoaiga, e pei ona tusitusia ma aumai i le lipoti, atoa ma saunoaga o lo o opea nei i le Laulau-a-Fono? E faigata ona tele ni mea e maua i se faatau pe a ta alu atu i le faleloa ma le tala Samoa. E leai se malamalama faapitoa o le mataupu o le tamaoaiga tau faasoa. A o le fesil la, ona e ese lava le taulagi ma felafolafoaiga na avatu i lo tatou Maota nei, ae ese le faigata pe a alu atu ma le \$10 ae laitiiti mea e faatau mai ai, aua le tausiga o le aiga ma le soifua. O lau fesili muamua lea.

O lau fesili lona lua, lau Afioga i le Fofoga Fetalai, e faaupu faapea. Talu ai o lea e tau, e tau Samoa o le atunuu o le lalolagi lona tolu (Third World Nation); e tau Samoa o le atunuu o lona 31 lea o atunuu matitiva o lo tuu i ai Samoa. A o faavasegaga ma tau e afua mai i atunuu mauoloa, mau tupe atunuu tetele ma le malolosi? E pei ua avea na faiga ma mea ua nonofo ai lava tatou i Samoa nei ma faapea ifo, o tatou e tatou te aupito matitiva; o tatou lea e i le lalolagi lona tolu. Ia o au fesili na e lua i le amataga.

Ona faapea atu lea o lou lava taofi na o au. Ou te le talitonu o Samoa e i se lalolagi lona tolu, po o se lalolagi lona lua, pe o se lalolagi muamua. E lei faavasegaina maia Samoa e la atunuu o le lalolagi, o Samoa lava ua uma ona tofi. Ou te le talitonu foi o Samoa o se atunuu mativa. Ou te talitonu e ese le matalasi o le alofa o le Atua ma ana faamanuiaga ia e aumai i le atunuu lenei. A fesili mai la se tasi o tagata atamamai i le faatuputupulaia o le tamaoaiga o le lalolagi - Aiono e faapefea ona faavae lenei talitonuga maualuga e te fealuai

ma oe? Ona ou faapea atu lea, e tolu lava vaega tetele o le tamaoaiga o Samoa. O le vaega muamua, o ona tagata soifua, tagata malolosi tagata aulelei, tagata ua iloa faitau tusi ma tusitusi i le gagana Samoa. Lea e avatu i le tusi lea mai le Ofisa o le Matagaluega o mataupu faamaumauina, le faamaninoga o lena mau. O tagata malolosi, e le tele ni faamai. O le uluai molimau foi a tagata mai fafo na omai i lo tatou atunuu, e ese le malolosi o tagata Samoa. O le ala lena na ala ai ona avea le faamai taatele i atunuu na, e tau o le (influenza) ma faamai tele iinei i Samoa i le tausaga 1918. A o lea foi e aumai i pepa ia faamaumauina, o lea lava e oo mai i le 1923 o le faamai lava lena o lo o tele ina malilili ai le tatou atunuu o le (influenza).

Ona sosoo mai lea ma le gasegase o le laualo, ma le gasegase o le vaai po o fofoga. Ia sei vaai i le matagofie ma le malolosi o lenei atunuu. O le atunuu foi ua 100% lona silafia e faitau-tusi ma tusitusi. O le tatou o alea ma le tamaoaiga muamua, lea na ou taua. O le 1900 na fai mai ai le lipoti, ua iloa uma lava e Samoa ona tusitusi ma faitau tusi, e faatusatusa i isi atunuu. O lea e fai mai le tusi lea, o le tausaga e 1984 e 51,851 tagata aoga na aoga i a tatou Aoga, po o le 32.6% o le faitau aofai o tagata Samoa. Atonu lau Afioga i le Fofoga Fealai, ua lava na fuainumera e faamautu ai le taofi o lea lava ou te fealuai ma au. O tagata soifua o le atunuu lenei o Samoa o le tasi lena o tamaoaiga ma le oa e fau ai ni oa, tulou lava le paia o le soifua ma le tagata soifua. A o lea e fai mai, o tatou tatou te matitiva.

Ae a ou tilotilo nei la i le isi vaega lea o le saunoaga faa-Minisita a le Afioga i le alii Palemia, o lo o faapea mai ai o fuafuaga tau tupe po o faavae aoao tau tupe a le Malo o Samoa i Sisifo. O la e i ai le faa-peretania, o le taimi lenei e fusi mau ai fusipau. Ona ou faapea lea lau Afioga i le Fofoga Fetalai, na amata mai lava le fono lenei o sau i lau faalogo, e i ai fuafuaga o lo o i ai mafatiaga e tele o Matagaluega i le le lava o tagata faigaluega ma tagata aoaoina lelei ma saunia lelei mo le faiga o le Matagaluega ma lea Matagaluega aemaise le Matagaluega lea o le Ofisa o Aoga. Ona faapea ai lea o si au fautuaga lau Afioga, aua nei avea ia ia fuafuaga, o le fusi mau o le tatou oa muamua lea, le atiina aeina o le tagata soifua, ina ia lelei saunia ma tapena mo faiva eese o lo o manaomia e lo tatou Malo.

O lona lua o au oa faatupu oa o le tatou laueleele.

Faafetai atu i Afioga i alii Faipule i lo latou faatuina mai o le lafo ma faaluaina, faafetai i lo outou finagalo tamalii.

O lona lua la o oa faatupu oa po o le tamaoaiga a lo tatou atunuu i lau lava matau ma le faitau, o o tatou laufanua o le sami e oo lava i le vanimonimo o Samoa. A foi lea na faamaonia nei, na fana ai e le tagata i le vateatea a le Malo tele o Amerika, ae sa autovaa i lo tatou atunuu aemaise Tutuila, ia tagata suesue a matauina le vanimonimo, ona o le vanimonimo iinei e ese le mama ma le manino, ina ia mafai ona toe faaofiina mai i lo tatou lalolagi ia tagata ia na o atu i le vateatea.

E ese lava Samoa ia i ona laufanua ma lona sami, o lena ua leai se tasi o lenei mamalu ua sasao nei, e lei oo atu i atunuu ia mai fafo, o lo o aumai ai a tatou fesoasoani tupe ma aumai ai a tatou fesoasoani i tagata soifua ma o latou poto faapitoa, ua leva ona oo i ai. Na oo i ai i le 19 senetanari. E le o maua la mai le taimi lena o le 20 senetanari ia fita ma toatuga sa latou feagai. Afai ia se loto mo le eletise, e tele ia aai o Peretania na matua lilo i le vai, tele ma tagi ma mafatia o la e na ona fetagisi i upu tusitusia, e le o toe faafofoga i ai se isi. O lenei lo tatou atunuu laitiiti lava Samoa ma lona laufanua matagofie, o lana aganuu ma lona soifua o la e faavae ma faalagolago i le suavai o vaitafe ma vailepa, o noanoa ma vaitoa lea o le a tele lava le suiga, le suiga o le soifuaga e pei e faale-ilogaga ma faale-amanaia, a o lea ua i ai ona ua fai a tatou eletise e alu i le suavai mai o tatou vaitafe ma vai inu. O lea foi ua tulai mai ii, o lo o i ai pea le fuafuaga o lo o faatupu mai e le Malo e tele lana oa, ona o le suauu ina ia faia se isi auala e maua mai ai le eletise, ae faaoga ai le lauu ma le fafie. Talofa Samoa po o le a le umi e fai ai lena fuafuaga, ae matua leai ni lauu? O ou laufanua e lanu meamata ma lau usiusi. O lea e i ai ia le la e oso mai pea i le taeao ma goto i le afiafi. O le la foi o Samoa e mu totoa ma e matua vevela lava. O lea e i ai lona sami e pei ona ou taua, e pupue ma mau le sami o Samoa. O la foi ua i ai le poto faapitoa i atunuu i fafo, e mafai ai ona liliu le vevela o le la, ma liliu le pupue ma le mau o galu o le sami e gaosi ai le eletise. Atonu e faigata, e le taumate ua leva ona oo i ai le tofa liliu a le Malo i na auala. Afai e taugata ma faigata, ae ou te talosaga atu lava ma fautua atu, tatou o muamua i ai; tatou o muamua i ai i lena ae faasaoina le tasi lea oa faioloa a lo tatou atunuu, o le tatou laufanua ma le tatou sami.

O lona tolu, o oa faioa e maua mai ai foi ma tupe, o le tatou aganuu. O le vaiaso lea lau Afioga i le Fofoga Fetalai, sa ou faatasi atu i se fonotaga sa faia i Ausetalia. O le fonotaga e faaulu faapea - O le Fonotaga a tamaitai o Ausetalia ma tamaitai o le Pasefika mo le filemu, ae leai se filemu; na matou molimauina. O le fonotaga vevesi ma le feaveai upu le manjuia ma le migao; o le fonotaga e tagi mai ia maua le filemu, ae matua leai lava se latou faavae e mafai ai ona tautala mai i le filemu po o le feavatai. O lea e ia te i tatou le aganuu, le aganuu a Samoa. O lea e i ai uma lava i le Faavae a le aganuu a Samoa, ia auala e mafai ai ona tatou tapa pe a tatou sailia se fofo mo so o se mea lava, so o se faaletonu o le tatou sofiuaga. O lea foi e aumai i i tusitusiga a le tusi lava lenei, e na o le 305 tagata sa faalepuipui i le 1984. Ae o o tatou falepuipui foi ua fai ma tala ofofogia i atunuu i fafo; ona pau lea o le Toese, e tasi le malu o Malo, e tasi le Leoleo. Ae o fale o la e nonofo ai e i le Toese, e leai ni puipui sima po o ni puipui uamea. O lea ou te tautala i fale o lo o i le motu tele i Salafai. A oo atu i ai asiasiga a tagata mai fafo, e tetei. O le a le malosi lea e mafai ai ona faafesagai le Leoleo e toatasi ma ni pagota se toa 40? E tetei. O lea foi e na o Samoa nei e mafai ona o

atu ia e o lo o faasalaina, e aso Sa i o latou aiga. E le o toe i ai foi se na te tuliloaina ina ia toe foi mai i le falepuipui.

O le tasi po na matua maua mai ai se pagota e mamao i tua le nuu e sau ai, e taunuu mai inei ua alu le taavale a Tafaigata. Na saili sana taavale laitiiti e toe foi ai i le Toese. O fea o aumai ai lena malosi? Ou te talitonu, o le tatou aganuu. A silasila i agasala e ala ai ona o ma ave i le falepuipui, o le lima tagoese e na o le 85 tagata. O le ulufale i fale mo se fuafuaga e gaioi se mea, e 20 tagata; tagata ua le totogia a latou sala i le Fale Faamasino e 58; o e ua le totogia a latou aitalafu i nogatupe e 22; ae 305 na ave i le Falepuipui. E 1984 na ave i luma o le faamaisnoga i le tausaga lea e '84 ae 1535, ona o ni a latou solitulafono i le alatele ma avetaavale. A liliu atu i le taimi e nofotane ai ma faiava tagata o se atunuu, o le faafitauli tele na o lo o feagai ma na Malo ma tele ai a latou tupe e alu, ona e amata mai lava ona nofotane o laiti. A o le a pe afai e faamaonia lenei tusi, o le va o le 20 i le 29 tausaga, e alo atu ai le tama ma le teine Samoa e faaipoipo ma faiaiga. O lea lava, o le malosi o le aganuu. O le malosi o le aganuu lea e taua ai le teine-muli o tamaitai Samoa ma faapelepele ai le tuagane i lona tuafafine ina ia malupuipuia; o le malosi o le aganuu. O lena, ana le fai mai le feagaiga a (Perelini) i le 1875, e le faia ni tatou toese, le faia ni o tatou Leoleo aua o lea sa malu puipuia ia Samoa i lana aganuu.

O lou la taofi lau Afioga i le Fofoga Fetalai, e le mativa lo tatou atunuu. O lena ua ou faamatala atu, atonu pe na o ni mai mea e tau ai ni au sailiiliga ma sou taofi. Ae o lau talosaga lava lenei e ala atu i lau Afioga ma le tatou Malo, sei silasila ane, fai a tatou fuafuaga mo le atiina ae, ina ia tatou naunau lava ia mau tupe Samoa ae tiai ai lona mauoa ma lona tamaoaga.

Ia o si au fesoasoani atu lea i nai ou mafauaiga, i le filiga o le tofa ma aoina o le manogi o le lolo, ina ia manuia ia lo tatou Malo ma si o tatou atunuu.

Afioga FIAME NAOMI



Itumalo Faaalaalafaga:

Lotofaga

Filifilia:

2 Mati 1985

Faatauto:

19 Mati 1985

Lauga Faataupou:

18 Fepuari 1986

Ou te faafetai atu i lau Afioga i le Fofoga Fetalai ona o lau saunoaga e faasilasila ma le amanaia o le tulai atu o lenei sui usufono e molimoli atu se manatu po'o se taofi vaivai aua le Nofoa o lenei itumalo.

Lau Afioga i le Fofoga Fetalai ma le mamalu o lenei Palemene, ou te talitonu o paia o lenei Maota ua faatasia uma i ai paia faale aganuu ma paia faale Malo. O lea o

lo'o afio ai lau Afioga i le Fofoga Fetalai, lau Afioga Nonumalo o le Maoputasi o le Tama a le Malo. O lea foi o lo'o afio ai le Afioga i le Palemia, lau Afioga Vaai o le Aloalii, o lo'o afio ai foi le Sui Palemia, Tofa Tupuola Efi, afio le mamalu o le Kapeneta i Afioga i Minisita, a outou afioga i tamalii faapea failauga, Susuga i sui usufono o le Au Palota Taitoatasi, Susuga George Lober ma le Susuga Netzler, Jacob Olaf Jack. O lo'o afio foi le paia ma le mamalu i a outou Afioga i Alii ma Tamaitai sui usufono o le Palemene, o ē o lo'o lagolagoina le itu tau Upufai Soofaatasi lea o lo'o tulai mai nei i le Faigamalo. O lea o lo'o afio ai le Taitai o le Itu Agai, Afioga Tofilau Eti Alesana o le Tootoolii; o lo'o afio ai foi Afioga i sui usufono o sui o itumalo o lo'o lagolagoina le Itu Faaupufai e Puiapuia Aia Tatau a Tagata Soifua.

I lenei taeao, i le afio o le paia o lenei Maota, ou te faapea atu, mapu ane ia i o outou seetaga mālū ae se'i ou soso atu aua le tapuaiga a Samoa. Ia papa-aao ia le paia maua i le afio o Lana Afioga Mamalu O Le Ao o le Malo, Susuga i le Malietoa, lau Afioga i le Tama a Aiga, afio ma papa-aao lau Afioga i le Sui o le Fono a Sui Tofia, Afioga i le Tuiatua Mataafa Faasuamaleaui Puela, o le tama a Salevalasi. Afio Aiga, o le paia lava lea i Aiga ma a latou Tama, o Tama foi ma o latou Aiga, Alaalatai Tumua ma Pule, Itua'u ma Alataua, Aiga i le Tai ma le Vaa o Fonoti. O ou paia na Samoa e le faaopoopoina i so'u leo pe toesea.

O le Itu faale-Agaga, le mamalu i le Aufaigaluega a le Atua, a outou Susuga i Faafegaiga o e o lo'o tauasuina le vai o le Ola aua le soifua faale-Agaga o lo tatou atunuu.

Ia le mamalu e lautele o si o tatou atunuu, i ou tulaga faalupelupeina o afio nei. E mulimuli atu sou leo e faapea – O le avanoa muamua lenei ua tulai atu ai lo'u Tootoo, ou te faapea atu ai i lo'u itumalo Lotofaga, i le paia o le Aiga Salevalasi i le afio o lau afioga le Matuaitofiga, le paia i Ulua'i Sa'o ma e na Ausa'o, le Faleagafulu ma le Falevalu, le Alii o le Ao ma i laua Faauluuluga. Alaalatai oulua Aliimau o Faleupolu, Lemauga ma le Aiga Sa-Sitagatā, le vaa na taumua lasi i Faigamalo. Lo'u itumalo e, ia tapuai maia se'i taumafai atu lo outou sui usufono aua se sao i le faalaga-maea a le Malo o Samoa.

Lau Afioga i le Fofoga Fetalai, o le lagona o le faafetai i lenei taeao e muamua ona momoli lea i le Atua; le Atua e ana le pule, e ana le malosi uma lava. E faafetaia Lona alofa ma Lona agalelei ua faataunuina ai lenei faamoemoe i se tofa na atofaina ai lenei aso e lau Afioga i le Palemia ma le mamalu o lenei Palemene, ina ia tatou tauaofia ai e tauave ma faaauau galuega a le Palemene. O le faafetai lea i le alofa o le Atua. E tuu atu pea i Ona Aao ae ia Viia pea Lona Suafa i so'o se galuega tatou te faia.

O taeao o Samoa - e tele taeao o Samoa. O le taeao e te tautua Tumua ma Pule, o taeao ua ou iloa, a'o le taeao ua manatua i lo'u loto i lenei tauaofiaga a le Palemene, o le

taeo lea nai Tiafau. O le taeo lea i le aso 1 Ianuari 1962 na faataunuina ai le faamoemoe o Samoa, ina ua tulai mai lona Malo Tutoatasi. O le taeo lea na i ai ni vaaiga e faailoga ai le manuia o Samoa. O le a lea? E le taumate e toatele nisi o lenei Maota sa molimauina lena aso. Sa tō timuga, sa tatafe vai, ua suasua autu i le taulaga o Apia. Ae a le tali'oli'o o Tiafau nei, ua laofie? O vaaiga iloga ia o le faamanuiaga a le Atua ia Samoa ma lona tulai mai, o se Malo Tutoatasi. Ioe, le mamalu e o sui usufono o le Palemene, ia tatou aumaia lenei taeo ia faatino ai le faamanuiaga a le Atua i lo outou soifua ma lo tatou ola e fai ma fetu pupula aua lo tatou nofo tautua i le faatinoina o galuega a le Malo. Ia avea lena taeo e fai ma auala tatou te fultua ai i faiga tau faaleaga, i faiga faa-feitagai e pei ona aliali mai pea i nei ona po. O moomooga na o le agaga ma saafiafiga o lou nei sui fou i taeo o lenei atunuu, na outou soifua mai ai ma tatou ola ai.

Lau Afioga i le Fofoga Fetalai, i lenei taeo o lou mafaufau i se tualga po o se vaega e autu ai sou uluai manatu i totonu o lenei Maota, ua ou filifilia ai le tulaga lenei o le Malo. O le a lenei mea o le Malo? O se Malo o se faiga lea faataupulega aiaia. O aiaiga o lo o faataatia mai ai le fausia na faavaeina ai lenei Malo, lea ua i le api lenei, le Faavae o le Tutoatasi o Samoa. O lona uiga, e faatulafonoina le tulai mai o le tatou Malo.

I le Faavae lea sa saunoa i ai se tasi Sui, ma ua ou lagona lava lou fiafia i le sosoo o a ma lauga ma le taulelea matua lea, le Susuga ia Netzler. Aua ou te talitonu, a o faatasi leo o matai o le atunuu ma ona taulelea matutua ua lelei se pulega o lo o i ai.

Lau afioga i le Fofoga Fetalai ma le mamalu o lenei Palemene, o le tulai mai o se faiga malo o le tulai mai lea o se faiga po o se malosi faapulega matautia. O faiga faapulega, e le oo i ai lo tatou malosi taitoatasi. A tuu i se isi faaupuga, o se aupega. Ma i so o se aupega malosi, ou te manatu lau afioga a le Fofoga Fetalai ma le Palemene, e ono tataua ona tatou faaaogaina lena aupega ma le faaeteete. Aua o se tasi itu e taua le i ai o le malosi faapulega aua e le mafai ona faatino galuega a se Malo, pe a leai lena malosi. A i se tasi foi itu, e le mafai ona alofia le natura o le tagata, na te taumafai ai e faaaogaina lena malosi mo sona lelei na o ia mo se lelei faapitua. O itu ia e ono tataua ona silasila ma sailiili loloto i ai i tatou nei ua avea ma Taitai e faatinoina pulega faale Malo.

Lau afioga i le Fofoga Fetalai ma le mamalu o le Palemene, i se vaaiga faale mafaufau i le tulaga o le malosi faapulega, o lo o i ai ni vaega e tolu e faavae pe fausia ai se malo faapulega. O ia vaega e aofia ai – Muamua o le tagata; o se tasi lea o faavae o malosi faalupega; Lona lua, o le tamaoiga i meatotino; Lona tolu, o le malosi faapulega e faavae lea i luga o talitonuga. E pei foi ona tolu vaega e faavaeina ai le malosi faapulega, e faapea foi ona tolu auala e faatino ai lea malosi. I le muamua, i se upu faigofie ua ou tau faapea, o le malosi faamalosi. I le ituaiga malosi foi lea

e matele i ai tamaiti, le tamaitiiti foi lea e tino laulaua ma le soona faia o isi tamaiti tino vavale. O le malosi lea e faaaoga e le Atua i a latou fanau e faatonu ai, o le malosi foi lea e faaaoga e le itupa malosi i le itupa vaivai. E oo lava i faiga Malo, e faapea foi ona faaaogaina lea ituaiga malosi e Malo tetele i Malo laiti.

O le auala lona lua e faatino ai le malosi faapulega, ou te taua lea o le tauitu e faatautua. O le ituaiga malosi lea e faaaoga soo ma faaaoga tele i faiga faafaigaluega, faiga faapisinisi ma nisi itu o faiga faatosina. O le auala lona tolu ma le auala mulimuli lea e faatino ai se malosi faapulega, o se faiga lea faataupulega. O se auala lea e faaaogaina e faiga Malo, e Faalapotopotoga e pei o Faalapotopotoga tumaoti.

A silasila lau afioga i le Fofoga Fetalai ma le mamalu o lenei Maota i le Malo lenei o Samoa, ma le malosi faapulega o lo o i ai i ona aao ma o tatou lima, o lo o i ai uma iina Faavae ia ua ou laulauina atu, ma auala e faatinoina ai le malosi faapulega.

O le itu tau Faavae i le tagata. O ai ia tagata? O tagata o lo o fai ma Taitai o le Malo. E matautua o latou uiga faataitai, uiga faatosina loto, uiga faamomoi loto; ma ua fai lea ma faavae ua tuuina atu i ai le malosi faapulega. I le faavae lea e tulai mai i luga o le tamaoiga i meatotino, a silasila a outou afioga i alii Faipule, lau afioga a le Fofoga Fetalai i tausaga fai mai, i le Tala Faatatau o le Tupe. O le fua lena o le tamaoiga a le Malo, a o le tamaoiga lena tau tupe ae e le o aofia ai ona laueleele, ana faatoaga i faiga faatupu tupe ma isi lava tulaga e faatupuina ai le tamaoiga. Ioe, e tele le faatamaoigaina o le Malo. A taatia atu i le faavae lea e fausia i luga o le talitonuga, ia o lea ua tu le Malo o Samoa i lona tulaga tutoatasi, ona o le finagalo autasi o ona tagata. Ma ou te fia faitauina atu upu tumuli o le faatomuaga o le Faavae, lea sa faitauina atu e le Susuga Netzler upu tomua. A o upu tumuli lea e fai ma faataitai o le talitonuga lea ua fausia ma faavaeina ai le Malo. “Ina ua i ai le finagalo autasi o Samoa i Sisifo, o lona tutoatasi ma ana aia tataua e tataua ona puipua pea ia malu. O le mea lea, o i matou o tagata Samoa i Sisifo, i la matou Fono Faavae i lenei aso 28 Oketopa 1960, ua matou faaaogaina nei, faia ma avea ma tulafono ma tuuina ia i matou lenei Faavae”. Auala e faamalosi ai le itu faapulega. I le itu lea o le faamalosi, ua i ai i le Malo lea tulaga. I fea lea? I le vaega foi lea o Leoleo, latou te vaaia ma tausia le tausia e tagata Samoa o le Tulafono. I le itu i le Tauitu e faatino ai lona malosi faapulega – Ua mafai e le Malo ona totogi tagata na te faafaigaluegaina. E pei a silasila i ai a outou afioga i alii faipule, i le Tala Faatatau o le Tupe lea o lo o i outou aao nei, e tele se vaega o le tamaoiga o Samoa e alu i le totogiina o ana afaigaluega, ma o lea foi ua faaopoopoina i lenei Tala o le Tupe. I le auala e faatino ai le malosi faapulega mulimuli o faiga ia faapulega o lea o lo o taatia i ia? O le Maota lenei i le afioga i le alii Palemia ma le Kapeneta, o le Faamasinoga o le afaigaluega. O itu ia ua mafai ai e le Malo ona ia faatino lona malosi

faapulega. I sa outou faafofoga mai, ou te manatu ailoga e fou nei fuaitau ua ou faalaulauina atu. Ae ou te lagona, o le taua o lo tatou pai pea i tulaga nei o le malosi faapulega; e mafai ai ona tatou asiasia o tatou loto ma ni o outou finagalo, aemaise e o lo o tauaveina tulaga taitai o Faiga Malo. E matautia le auupega ua i o outou aao ma o tatou lima ia tatou faaaogaina ma le tatau ma le faaeteete aua o lo o faatulgaina ma aiaia i totonu o le Tulafono Faavae.

I le tulaga lava lea o le malosi faapulega, ou te talitonu ma ua outou silafia foi, e i ai isi malosi faapulega i fafo atu o le Malo ua tulai mai i totonu lava o Samoa. O a malosi faapulega nei? Lea e i ai le aufaigaluega, le aufai pisinisi, ma Faalapotopotoga tumaoti ma lea e i ai vaega tau upufai. O nisi itu nei o malosi faapulega, ua latou tulai mai ona o se talitonuga, e i ai ni a latou galuega e faaleleia atili ai le soifua faale tagata, ma latou taumafai foi e uunaia finagalo o le Malo ina ia faia ni laasaga, ina ia faataunuina ai o latou manaoga i ni tulaga o lo o fia maua. Ina nei tei ua matau mai, ia outou afioga Faipule lau afioga a le Fofoga Fetalai, pe ua ou faapea atu e leaga ia tulaga o le tulai mai o isi ia pulega, o isi malosi faapulega e ese mai le malosi faapulega a le Malo. E leai, e le o malosi faapulega e ese mai le malosi faapulega a le Malo. E leai, e le o lea. A tatou talitonu i le agaga moni o le faa-temokarasi, e tatau ona taliaina gofie ni finagalo o le Malo o tulai mai foi o ia itu tau malosi faapulega. Ae na o lenei, o le Malo e i ai le faataatau, i le faataunuina po o le le faaunuina o manaoga ma faamoemoega. O nisi ia itu tau malosi faapulega, aua o le malo e i ai le pule faasoasoa ina ia maua ai le manuia o tagata lautele, ae le o se vaega faapitoa. E tatau foi ona silasila le Malo i le tulaga lea o se isi vaega, ae fai lea ma auala e faamanuaina ai se isi vaega. E iloga gofie pe a faapea ua le tonu le pule faasoasoa a le Malo. O a auala e iloa mai ai? O auala ia o vevesiga ma nisi faiga e saveuina ai le filemu.

Ina nei tei ua umi lau tautalaga, ae tasi lava le vaega i le itu lava lenei i le malosi faapulega ou te fia oo atu i ai. O le vaega lea e faataatau i le va feagai ai o le malosi faapulega faale-Malo ma le malosi faapulega faale aganuu. Ou te talitonu o le Malo o Samoa e faavaeina i tu ma aganuu. Ma e i le faavae na sau ai lo tatou atunuu mai aso anamua, na faavae mai i le pulega faamatai, le pule lea a alii ma faipule. Ou te talitonu e oo mai lava i nei auga tupulaga, o lo o tumau pea le malosi faapulega faale aganuu. O a molimau vaaia o lea tulaga?

O le Maota lenei, lea foi sa taua e le Susuga Netzler. I le 47 o Nofoa o le Maota, o le 45 o matai e filifilia mai e matai. O le a se isi faailoga o le malosi o le aganuu? O le tatou aiaia lea o ni Tulafono e puipuia ai le umia o ona laufanua? Ou te talitonu lau afioga a le Fofoga Fetalai ma le mamalu o le Palemene, e faalagolago le malosi faapulega a le Malo i le malosi lea o le aganuu aemaise i le itu tau le nofo toafilemu o ona lava tagata. E faafofoga pea i isi faiga malo ma nisi atunuu o i fafo, ua latou le toafilemu i taua ma fevaevaeaiga. Ae a Samoa?

Fai mai se tasi mua fetalai, “E tala tau Toga, ae tala tofi Samoa”. Ioe, o Samoa ua uma ona tofi. Mai i ia tofiga, e tulai mai ai le maopoopo o ana fuafuaga ma ana taupulepuelga.

Lau afioga i le Fofoga Fetalai ma lenei Maota, ua ou pai atu i le malosi faale Tulafono, malosi faale aganuu, ae e i ai ona aoaoga. O le a lea? O le Atua lea, le Atua e Ona le malosi uma lava. A faapea e i ai se tatalo lilo i lou nei agaga ma lou atunuu, ou te fia faaleoina i upu nei. I la le Salamo o faapea mai – “Ia i ai le filemu i totonu ou pa, ma le manuia i totonu o ou Maota”.

Lau afioga i le Fofoga Fetalai ma Sui mamalu o lenei Palemene, o nai manatu vaivai na, e molimoli atu ai le agaga o le fiafia ma le faafetai, i le maua o lenei avanoa e tautuaina ai le Malo o Samoa. Ma ou te faamoemoe e faapea foi se lagona i a outou afioga i alii Faipule, alu afioga le alii Palemia ma lau Kapeneta, ia tatou maua lena agaga o le fiafia e tautuaina ai Samoa mo lona manuia lautele.

Lau afioga i le Fofoga Fetalai, e tusa ai ma le Tulafono o tulai mai o le Tala Faataatau o le Tupe, e le tele ni vaega e fia oo i ai se leo o lenei sui, e fou mai foi i faiga faaPalemene. E le o atoatoa foi se malamalama i le faafesili atu lea e tusa ma lea Tulafono. Ae pei o nai vaega laiti ia e pei ona tulai mai, o le saunoaga a le alii Minisita o Tupe i le itu lea tau tamaoiga. O lo o faapea mai ai, ua fia faapauina le tau o le soifua ma nisi lava faiga e faaleleia atili ai le tau o le soifua. Ae i le matau atu a lenei sui fou, peiseai o tupe faaalu uma, ae ou te le o malamalama atoatoa i le tulaga i le tupe maua mai e faatino uma ai na fuafuaga. E pei o le faafesili lena e tuu atu i le afioga i le alii Minisita. Ou te manatu, o tupe e maua mai i atiina ae a le Malo o le a faatinoina ai ia fuafuaga. Ia a faapea o se taimi vave e fia maua mai ai sea faamalologa mo le tatou atunuu, ia atonu e tuai mai fua o atiina ae.

I le isi itu ua tau atugalua ai le faamoemoe o lenei sui, o lea ua taua mai i le vaega lea o Faatoaga, le saunoaga a le alii Minisita o lo o faapea mai ai, e tatau ona i ai ni fuafuaga ia suia ai le faiga o faatoaga. I le aufai faatoaga o lo o i ai nei, e le tele ni o latou laufanua, ma e le tele se tamaoiga e maua mai ai. Ma o lo o faapea la o lo o fia saili se auala e maua ai ni faiga faa-faatoaga se tele e pei o (commercial farming) po o a nisi mea e silafia e a outou afioga i alii Minisita. Ou te talitonu o se fuafuaga lelei lea mo le tamaoiga. Ae tasi lava lea, ma ou te faafesili atu ai i lau afioga a le alii Minisita o Tupe po o le Minisita o Faatoaga, po o le a se fuafuaga a le Malo e tusa ai ma le umia o fanua i suafa matai Samoa? Aua e le toatele nisi o tatou o matai Samoa e tetele ni a tatou fanua, o le tele lava e itiiti laufanua o lo o tatou galulue ai.

E pei ona pau lea o ni tulaga ua maua e lenei sui e tusa ma le Tulafono ua tuuina mai nei i luma o le Palemene. Ma lou talitonuga, o le tatou pasia o lenei Tulafono, o se mea e tatau ma talafeagai aua o lo o faatalitali mai i ai le

faagaoioiga o galuega a le Malo faapea foi se faatinoina o se manuia o le tatou atunuu lautele.

O se matou lauga lea lau afioga i le Fofoga Fetalai. Tau ina ia alofa le Atua ia fesoasoani mai ma lagolago mai i lenei Maota i lona alo atu i ana galuega. Faapea foi i le tatalo ia faamanuia mai le Atua i lo tatou atunuu, i ona tulaga lautele ma faalupelupeina, e amata mai i ona Taitai, seia oo lava i ana tama fanau.

Ia soifua ma ia manuia.

Afioga LEILUA PUNIVALU



Itumalo Faaalafaga:

Falealili

Filifilia:

2 Mati 1985

Faatauto:

19 Mati 1985

Lauga Faataupou:

4 Iulai 1985

Faafetai i lau Afioga i le Fofoga Fetalai mo le

avanoa.

Ou te tulai atu ona o le pepa lenei ua tauaoina e le mamalu o le Palemene, o le lauga a le Afioga i le alii Palemia. Ma e momoli atu ai le faafetai, ona le tulaga ua faaalua o lo o i ai le tamaoiga faatasi ai ma galuega atiae o lo o taumafai i ai le Malo. Ae ua ou tulai atu ona o le faaiuga lea o lo o i ai le saunoaga a le alii Palemia, e talia ma le fiafia le faitioga faatasi ma ni fautuaga. Ma o le mea la lea o le a taumafai i ai lou nei sui, ona o mea o lo o atagia e faatatau tonu i lou itumalo.

Muamua, o le vai taumafa i Falealili i Sisifo. O lenei vai, sa faagaoioia ma pulea e le itumalo. Ona faagasolo lea o le faasologa o le tausaga ma le maua le Malo Tutoatasi o Samoa i Sisifo, ona tuu mai lea i le Malo latou te pulea. E i ai le faatanoa i le faatoaga i Togitogiga, ma o iina e ala atu ai le vai. Ma o le vai e aofia ai Iliili, Saleilua, Poutasi, Matautu ma Vaovai. O lenei la faatanoa na muamua i ai i lea ogavao, ma lea oga eleele. Ina ua atiae faatoaga e pulea e le Malo, ona taina lea o le vao ma tuu i ai ni lafu manu papalagi; Ae fai mai foi faasalaluga a le Malo, aua le taina le vao i mea o i ai vai taumafa i lea itu ma lea itumalo, e faaigoaina o (Water Catchment) Faatanoa e tali ai le suavai. Ia ae peitai, ina ua faagasolo le atiina ae ua saunia e le Malo, o le mea ua tupu mai, ua pito i luga lafu povi po o manu papalagi, ae pito i lalo le faatanoa. O se ata la ua matauina, ia o a uma lava gaosa o lo o tupu i luga i mea o i ai lafu manu, ia ua faapena ona oo atu i le mea o i ai le vai taumafa. E lagona ai lava le faitio. Ta ofo foi i nei faiga. E fai foi o le folafola atu, e aua le taina le vao i mea o lo o i ai vai taumafa, ae a le Malo e ta. Sei ta foi toto ai se maumaga, ia ae ta toto ai lafu manu. Ma e le tau faamalalama atu lau Afioga i le Fofoga Fetalai, ia le iu e tafe i ai lenei vai. Ma e lagona e le itumalo le faanoanoa tele, ona o lea faiga sau a le Malo. O le mea

lea ou te tatalo ai, ia alofa lau Afioga a le alii Palemia ma le Kapeneta ma le Minisita o lo o faasino tonu i ai lenei talosaga, sei silasila ane. Ou te talitonu e le fia taumafa se tasi i se mea o lo o agai i ai le iu, o mea o lo o tausai ai ni manu, tulou. O lo o i ai le tane ua saunia lelei o lo o tu i Vaovai. Ma atonu ua uma ona fai i ai suesuega a alii popoto tau inisia vai. Ia ua lua nei pe tolu tausaga talu ona tu o le tane, e leai lava ma se suavai o lo o i ai i totonu. O le fesili - O a fea ea o le a maua ai se suavai i totonu o lenei tane? Ma ua loaloa ona tutoatasi Samoa, ae a ou vaavaai atu i tulaga faapenei e pei e faatauagavale i alalafaga i tua, ona lagona ai lea e lou sui le faanoanoa. Aua a matau atu ia tatou i Apia nei, o le mea e matauina e tasi lava le aso pe lua ua leai ai se vai, ia ua faapena ona fenatai ia le faiga, ina ia vave ona maua le vai. Ae i ia tausaga e tele, leai o lea lava e amo le pologa e nai nuu ia e i ai Vaovai, Matautu ma Tafatafa o lo o faasaga pea e amo pakete e aumai ai se suavai e ola ai. E masani ona faalogo i le faaupuga lenei 'Ola i le Vai', ae mafai ona ou faapea, o vai ia ua ta tau atu i le itu i Sisifo o Falealili, atonu e le o toe umi, ae mafai ona tutupu ai ni faamai, ona oo ai lea o le oti i le vai, tulou.

E faagasolo atu i le faiga o le Auala-ta lea e agai atu i Falealili. O lo o oo atu i Poutasi, ona saunia lea o le ala e tai ai vai foi nei pe a faapea i timuga. O le mea ua tuu i ai le alavai, ua tuu tonu lava e faafeagai ma le faleaoga. O taimi uma la e tatafe ai ma tetele timuga, ua leai se Aoga, ua tumu le Faleaoga i vai. Ona ta faapea lava lea, se o se Malo ina a faamaualuga, se Malo lava ina a le fai fuafua? Ai lava ona o i latou e malolosi, e tiga ona taumafai atu se itumalo sei e alofa ia tatai faaoo le vai i mea e agai i ai, ae leai lava; e ia o se mea lena e faigofie ma taugofie. O le tatalo, ia alofa lau Afioga i le alii Palemia ma le alii Minisita o Galuega, sei silasila ane, o le mea lea o lo o mafatia ai le Faleaoga i Poutasi le Aoga a le Itumalo, ona o a timuga ua tumu le Faleaoga i vai ona le aoga lea o le fanau.

O le auala-ta ua uma ona oo atu ma oo i Salani. A tau atu i Salani e leai se auala laupapa, ae ou te ofo foi i lenei auala-ta na fai atu i Apia, e i le va o le \$1-2 miliona na fai atu ai le auala-ta? Lau Afioga i le alii Palemia, a mafafau atu i ai, a ni faiga a le fai fuafua lelei? Aua o lenei auala laupapa, o le olataga lea o le isi itu o Falealili, ona e malosi lo latou fegasoloai. E le gata i le itu o Falealili soo faatasi atu ai ma Lotofaga ma le itu Aleipata. Ia ae tainane foi le atunuu i le faigofie o ana faiga malaga, aua a e fia oo i le isi itu o Sapoe, ia te taamilo i le 10 kilomita, ona e faatoa oo mai lea i le mea o lo o i ai le isi itu o le ta.

Lau Afioga i le alii Palemia e ui atu i le Fofoga Fetalai, e lagona lava le faanoanoa, ona ua maua le polofiti o le auala lenei i Falealili, ia ae aumai ave faata ai le va o Falefa ma Falevao. Sa ta faapea lava e \$50,000 e avatu ai le auala laupapa lea sa i Solosolo ona maua lea o le ala i lea vai tafe e ona pei ona moomia.

Ae faaiu atu ai nai au upu, sei alofa ifo i talosaga a le itumalo o mea ia faatasi ma ona ala-galue, ia fesoasoani ifo la outou faiga Malo. Ia manuia le Fono.

Afioga LUPEMATASILA FAAMALAGA



Itumalo Faaalaalafaga:

Falelatai & Samatau

Filifilia:

2 Mati 1985

Faatauto:

19 Mati 1985

Lauga Faataupou:

11 Iulai 1985

Faafetai lava i lau Afioga le Fofoga o le Fono, ua maua foi se avanoa e tulai atu ai i lenei taimi. Ua i luma o le Atua la tatou taulaga e pei ona saunoa i ai ae tatou faamoemoe ia i le Atua ia faaifo manu mo le aso. O tulaga o paia ma tulaga mamalu o le atunuu e pei ona masani ai, o le a le oo i ai sau faamatalaga aua o tulaga lava e masani i ai le atunuu i ona paia ma ona mamalu.

Ua ala ona ou tulai atu e fia fai sina manatu e faatatau i le lafo lea ua taatia nei i o tatou luma. O lea ua saunoa atu le Palemia, tatou te fialia lava e faafogafoga i finagalo ma o tatou faamoemoe e tusa ai ma lenei lafo. E lagona lava e lou sui-a-faipule lenei mataupu o lo o ua taatia mai nei i o tatou luma, ma o se mea e aliali mai ai ua i ai se faaletonu i totonu o le Palemene lenei. O lenei lafo ua matua maoae foi ma le logo lelei i le tofia e lea itumalo ma lea itumalo o le atunuu e fai ma sui o lo tatou atunuu aua se manuia o le Malo mo a taeao. A e o lenei la o lo o faafogafoga mai i a tatou felafolafoaiga, o lea ua tatou oo i ai i lenei mataupu e pei ona taatia nei le lafo i luga o la tatou Laulau.

E faapea atu sou manatu, e teena le lafo lenei a le Afioga ia Le Tagaloa ma e i ai foi si ou faanoanoaga i lenei lafo ona ua aliali mai ai se mataupu o le a faavevesi ai le atunuu ma aliali mai ai o se mea e le maua ai se fealofani o le atunuu. O le atunuu lenei, o le atunuu ua i ai lona Faavae o lona Malo, ua i ai tulaga masani o le atunuu o le fefaaaloaloi e pei o lana aganuu tatou te masani ai. O lenei taimi ua aliali mai ai i lenei lafo, ou te matua lagona e lou sui o se mea e matua matautia lea ua tupu mai. Samoa e, o la e tapuai mai lo tatou atunuu e pei ona filifilia i tatou e o tatou itumalo tatou te omai e fai lo tatou Malo ia manuia Samoa, a o lea ua faafogafoga mai o lea ua matagi taumuaina la tatou Fono, ua afatia le vaa o Samoa. Talofa, talofa o ai se fomai na te mafaia lenei mea, o ai se potona te mafaia lenei mea? Talofa, i le potona mai fafo o lea o le a ulufale mai i totonu o le atunuu, o lea o le a avea ma mea e faaleagaina ai le atunuu. O lena e ia te oe le tofa ma le faautaga e manuia ai Samoa. O le a le mea ua tatou felautoai ai i lenei taimi? O le a le mea ua tatou fefaaleagaai ai i le isi ou uso? Afai ua tulai mai lenei faiga malo, e le faapea o le a tumau ai. E uma atu toe sui mai, e faapea le mea lea e

alu ai le Malo. Afai ua tulai mai lenei faiga Malo i e ua latou umia nei tofi o lo tatou Malo, tatou o e opogi ia maopoopo, ia manuia Samoa i lona lumanai. O fea lou Faavae Samoa i le Atua? Po o ai e mamalu po o ai e paia o le atunuu ae tasi lava lo tatou, na o le Atua. Talofa lava i le tagata, o lea ua afio mai le alo o le Atua e faalelei. Ua maluu le Alii ae leai sana agasala. Samoa uu mau lou Faavae, Faavae Samoa i le Atua, faavae Samoa i lana aganuu, faaaloalo le isi tamalii i le isi tamalii, faaaloalo le isi failauga i le isi failauga.

Ua ala ona ou tulai atu e fia fesoasoani i la tatou mataupu. O ai ea na te sailia le manuia o le atunuu? O lena e i ou aao, o lena e i o tatou lima le manuia o Samoa. Afai tatou te felotoai, o le a la tatou mea e maua ai? Na o se Malo malepelepe e le manuia, e le solo lelei mea uma o o o agai i ai fuafuaga. O outou ua popoto i le faiga o le Malo, o lena e i o outou aao le manuia o le Malo.

Samoa e, tatou o ia i lea, o e opogai lo tatou Malo. O le a le mea tatou te maua i lo tatou feeseeseai? O se mea matua matuia le lafo lea ua oo mai o le toe faamalepe ua uma, e le o se mea faigofie le faamalepe, o se mea matua matuia. O lea e talosaga atu ai, tatou o ia i le Atua. Afai o le Faavae lea o lou Malo, ia tago ia i ai i le Faavae o lou Malo, teu i o tatou tafatafa faatamalii, faa-faleupolu aua e uma tofi toe sui mai tofi, ae tumau lava le Faavae o Samoa i le Atua.

O lea la e talosaga atu ai ma le agaga vaivai, ia alofa aumai manu i fale ae teuteu o tatou tafatafa. O a ni mea o faaleaga ai po o ni tulaga faaletonu ia faapena lava le aganuu a le atunuu o le fefaaaloaloi. O au upu ia, ia manuia la tatou Fonotaga i le aso.

Afioga MATAUTIA SAE



Itumalo Faaalaalafaga:

Faasaleleaga Nu.1

Filifilia:

19 Mati 1985

Faatauto:

31 Me 1985

Lauga Faataupou:

4 Iulai 1985

Faafetai lava i le avanoa ua tuuina mai e lau Afioga i le Fofoga Fetalai. E fou foi le leo i la outou faafogafoga faapea i la outou silafaga. Peitai, e lagona pea i le mafaufau e fia oo atu se leo e pa'i mālū atu ai e faafeiloa'i atu i le paia o le Maota.

Lau Afioga i le Fofoga o le Fono faapea le Afioga i le Palemia, Afioga i Minisita faapea sui usufono mamalu o Itumalo ua aofia. O le paia lava lea o Itumalo, Ituaa ma Alataua, Aiga i le Tai ma le Vaa o Fonoti, faapea le tapuaiga a Tama a Aiga, Susuga Malietoa le Tapaau Faasisina e faapea foi le Sui Ao o le Malo, le paia eseese i le nofo a Faafeagaiga o le Afaigaluega a le Atua o lo'o talafaauto i le Atunuu o lo'o aoao manogi aua le

Malo o Samoa. E faapea foi Sua ma le Vaifanua, Saole ma Saleaamua, Launiu na Saelua faapea foi Faatuiolemotu ma Tootoo o le Faleula.

Ou te faapa'i mālū atu, faafetai i le avanoa ua tuuina mai se'i oo atu ai so'u leo e faafeiloai atu ai i lo outou paia ma le mamalu. Se'i oo i se taimi e tatau ai ona faaali atu lea o so'u taofi, peitai e lagona e le agaga le faageetia. Sa leai se manatu ou te pa'i mai i lenei Maota maua, aua o le Maota ua aofaga faatasi i ai paia o Samoa. O lea ou te tautala atu ai ma lo'u faaloalo e avatu le faafetai ma le faamalo, ua malie taliga e faalogo, ua malie foi le agaga ma le mafafau i mataupu ua folasia e sui usufono mamalu o le Atunuu aua o outou aao lava o lo'o i ai le manuia o Samoa. E le faigofie, o le faiva o mafafauga. E liliu le tofa e faapea foi le utaga, e le maua gofie so tatou 'ai. E avatu ai le faamalo ma le faafetai i lo outou ma'ema'e ona o le Malo o Samoa ua atinae.

Ua tele mea ua faafofoga i ai le Atunuu ma ua tatou silafaga i ai, o mea sa outou galulue mai ai i le amataga seia oo mai i lenei taeao. E leai se mea i le lalolagi na te mafaia ona liliu ese finagalo o le paia o le Atunuu. E le faapea atu ai la o ai po'o ai. E tofua tatou ma le natura aemaise taimi pe a pa'i mai le alii o le lalolagi. Ou te le faatonu atu, e le a'oa'ia e Laupua Tamafaiga. O le tōfā mamao, a tatou pipii i le Atua e faatasi mai pea o Ia ma i tatou. E faigata le galuega o lo'o faafeagai ai, ae peitai, o le Atua e aumai ai malo atoa ma le Auaifaluga o lo'o punonou mo le manuia o le Atunuu - o lo'o tatalo mo le Maota lenei. O le mea lea e lagona ai le mafatia i lenei vaiaso ona e le'i atoatoa foi le malosi o le tino, peitai, e le'i tofia fua a'u e le Itumalo ma i latou na lagolagoina a'u. E le tatau la ona fai so'u loto. O lea na ou taumafai pea ou te fia maua mai le aofaiga o le Palemene i lenei vaiaso. E ui lava ina ou te le'i i ai i le amataga, ae ou te faamoemoe i le Atua aua e le ogatasi fuafuaga a le tagata ma le finagalo o le Atua. O le mea lea ou te faalatalata atu ai i lenei taeao, e le lava foi la'u faafetai ma le faamalo, ae faamoemoe i le Atua ia faatasi mai. O sina upu itiiti lenei e lagolago ai lo'u tulai atu, a'o la'u faafetai ua momoli atu i le paia o le Maota.

I le mataupu lea ua oo nei i ai le Afioga i le Palemia, e laitiiti lava le laina lea ou te fia tautala i ai ma fia faatepa ai i tua le Maota. O tatou ua mau malo ma ua faigaluega maua i le Malo, ua latou inu le sua o le Malo o lo'o 'ae'ae i latou ma manuia i lo latou soifuaga, a'o le lautele o le Atunuu latou te le'i lagona lava ma o lo'o faatalitai pea. O lea e inu e i latou e maumalo le sua, ae talofa e i le Atunuu o lo'o faatalitai pea pe sisina atu afea le vai i le fia inu e ala i le tau o le soifua. Ou te le fia faatonu atu a'o se fautuaga i le Malo i le tau o le soifuaga. Pau lava lenei o le mea lea ou te fia tautala i ai i le aso lenei. Ia outou alolofa ia inu le Atunuu.

O lea lava ua silafia e le Atunuu o lo'o 'uti'uti pea le faasoa a le Malo i mea tau tupe, ae ui i lea ia fetu'una'i, o outou o tagata malamalama, tulou. Ae tau fuafua se'i tau tuutuu ifo le tau o eleni, mamoe, suka ma mea

faapena. Aua o aso uma lava i le ao ma po, o i ina o le a fiafia ai le Atunuu aua o mea e manaomia pea. A'o nisi mea o lo'o fuafua e le Malo e ono faatali lava i se taimi. O le mea lea ia alofa le Malo ia tau faapa'u le tau o le soifuaga ma meataumafa i aso uma. Ua faigata aso nei i alo ma fanau ua tuuina atu i aoaoga, ua le lava foi se malosi o matua limavaivai, ae pau lenei o la'u fautuaga i lenei taeao, ia mālū foi le vai i la'u talosaga atu ma le ava tele.

Ona pau lea o se upu ua ou tautala atu ai ma lo'u faaloalo i lenei taeao. A i ai foi se upu ua sala e i ai lava lape o lauga. E fou foi le tagata o lo'o tulai atu, e tulai atu foi ae lili'a leaga e fou lo'u nei oo mai. Ua ou avatu se upu faafetai ma faamalo i le Malo, tau ina ia alofagia e le Atua ia faatamaoigaina outou. Ia faatumu outou i le alofa i le Atunuu ma o a'u upu ia.

Ni lagi e mamā ma ni ao tuataafalu i lau Afioga i le Fofoga Fetalai, ia fatamaoigaina pea oe aua le faafoeina o lenei Maota. E faapea foi ma ni lagi faatafa i le Afioga i le Palemia, ni ao taulia i lo outou vasega i Minisita, ia maua le tōfā mamao, ia maua le loto tele ma ia faatamaoigaina outou e le Atua aua le Atunuu. E faapea foi ni lagi faatafa i le vasega o sui usufono mamalu o sui o Itumalo taitasi. O a'u upu ia, ia ola foi le tagata. Ia manuia le taeao.

Afioga MULIPOLA FIATAU



Itumalo Faaalaalafaga:

Palauli Sisifo

Filifilia:

19 Mati 1985

Faatauto:

31 Me 1985

Lauga Faataupou:

4 Iulai 1985

Faafetai lava mo le avanoa i lau Afioga i le Fofoga o le Fono. Ua mavae sā o uila, ua te'a foi toaga o le taeao lea sa avea ai lau Afioga i le Fofoga Fetalai ma o tatou sui aua lo tatou va ma lo tatou Matai oi le lagi, i Lana tausiga i le pogisa ua tuanai po'o le po ua sola ina ia tatou maua i le filemu le aso fou i lona faatasi mai.

Ae ou te le'i tautala i se manatu po'o se upu na mafua ai ona ou tulai, e muamua ona faataalolo atu paia faale-Atua i Ulu o Ekalesia ma Taitai o Ekalesia o Samoa i Sasae ma Samoa i Sisifo, le aufai tatalo o i latou o lo'o punonou mo le manuia o Samoa ma ona tagata, tulou. Le paia i le tapuaiga a Lana Afioga Mamalu O Le Ao o le Malo ma Sui Tofia, le paia i Aiga ma a latou Tama, Tama ma o latou Aiga, Tumua ma Pule, Itua ma Alataua, Aiga i le Tai ma le Vaa o Fonoti, Faleupolu o Tofiga o Samoa, tulou. Le paia o lenei Maota i le Palemene o Samoa i Sisifo, le paia i lau Afioga i le Palemia, le paia i le Fofoga Fetalai ma le Afioga i le Sui Fofoga Fetalai, Afioga i Minisita o le Kapeneta, le paia ma le mamalu i sui usufono o lenei Maota ua tofia aloaia

e o latou Itumalo e fai ma sui o Nofoa o le Palemene; le paia i le Ofisa o le Fono Aoao; le paia i Ulu o Kamupani ma Ofisa eseese o lo' o latou galulue mo le manuia mo le soifua o le Atunuu.

Taalolo ia le paia o Samoa i Sisifo, e tatau foi ona maua se matou faamatalaga e agai i le tapuaiga a Samoa i Sasae. Le paia i a outou afioga i le Faleagafulu, le mamalu ia Sua ma le Vaifanua, Saole ma Saleaamua, Ituau ma Alataua, Fofu ma Aitulagi ma Upu i le Launiu na Saelua. O se upu e agai i le Motu o Manua, le paia i lau Afioga i le Laau na Amotasi, le paia i a outou afioga i le nofo a Faatui, le mamalu o Tooto o le Faleula, le Fale-Tauaitu tulou, po'o le Faletau-tagata.

Taalolo le paia ma le mamalu o Samoa ua potopoto ma ua aofia. E muamua ona ou faatulou atu i paia o lenei Maota, ae se'i agai sina faamatalaga i lo'u oo mai i totonu o lenei Maota ma lo'u nofoia o le Nofoa o Palauli Sisifo. Le paia i a outou afioga i Aiga, Suafa ma Sa Laulu, Tuato ma Tolovaa ma Salemuliaga ma le Fetalaiga ia Faatoaafe. E momoli atu la'u faafetai tele e tusa o lo outou tofia aloaia o a'u ua mafai ai ona ou nofoia le Nofoa o le tatou Itumalo. Le paia i a outou afioga i Tapaau, le nofo a ituaiga o Gagaemalae, le paia i lo outou aiga Sa le Valasi na muamua i ai paia o le Atunuu, tulou o le upu e tō ia te a'u, la outou tautalaga Faiumu ma upu i le Ati o Salemuliaga. Ana leai le tofa i Aiga ma se moe ia Tuatō ma Tolovaa ou te manatu e le faataunuaina lea faamoemoe. Ae momoli atu le faafetai tele e tusa ma la outou tofa ua tasi ma la outou moe ua tasi, ua mafai ai ona avea lo'u nei tagata ma outou sui e nofoia le Nofoa o le tatou Itumalo i totonu ole Palemene, faafetai.

I le vaai atu i lenei pepa, e tasi lava le sini o le faamoemoe i le saunoaga a le Afioga i le Palemia. O le sini o lo'o i ai o le atinae ia faaleleia le Atunuu i meatotino. I lo outou Aiga Minisita, i la outou tofa i Matagaluega o lo'o outou galulue ai, ou te manatu o le tofa lava lea e tasi mo le atinae ma le faaleleia o mea a le Atunuu. O lea la e momoli atu ai le faafetai i lea vaega ua mavae. Faafetai le galulue i nai masina ua tuanai ona ua tatou o ese mai le afā o le tausaga ua mavae ae ua tatou vaaia nisi o a tatou galuega ua tino mai, po'o nisi foi o a outou galuega na fuafuaina mo le faaiuga o lenei tausaga. O lea la e momoli atu ai le faafetai ma le faamalo e tusa ai ma le galuega tele sa faafeagai ai i ia masina ua te'a. Faafetai i sui usufono mo la outou lagolagosua e tusa ma lenei aso ma le mataupu ua i ai. Ia tatou maua le galulue faatasi ma tatou felagolagomai, o i ina o lo'o i ai le sini o le faamoemoe o Samoa ma ona tagata mo le lumanai.

E talosaga atu ma le faaaloalo, o nisi mataupu e fia tuuina atu i lau Afioga i le Palemia, lau Afioga i le Fofoga o le Fono ma le Aiga Minisita, le paia i sui usufono o le Palemene o loo tatou auai fatasi i le sauniuniga po'o le filifilia o mataupu mo le lelei o le Atunuu.

O nai mataupu mo lenei Itumalo. Muamua, ua tele ina aafia lenei Itumalo i le galu ma le faaaloalo lava. E talosagaina le Minisita o lo'o faafeagai ma lea galuega, ia alofagia le taligalu o lenei Itumalo ua faaleagaina ai le tele o aiga i le sami.

O lona lua, ia alofagia auala galue e pei ona tuuina atu e nisi o sui usufono. O lenei lava mataupu o lo'o fai ma sini 'au'au o faamoemoe o afioga ma alaafaga, e le gata i lea o Itumalo taitasi. E talosaga atu ai ma le faaaloalo ina ia faaauaina lenei galuega lelei mo le faaleleia o a tatou faatoaga mo le atinae i totonu o le Atunuu ma fafo atu, o lo'o tatou taumafai e saili mai ai se tasi alamanuia o le tatou Faigamalo.

O le tasi mataupu e pei ona maua i saunoaga a nisi o sui usufono, o nisi foi o atinae o tane vai o lo'o i ai nei, ia alofagia e le Minisita o lo'o faafeagai ma lea matata, se'i taumafai e faaauaina lea galuega lelei mo le soifua o tagata.

E le gata i lea o le Minisita o lo'o feagai ma le soifua maloloina. I le ava ma le faaaloalo e mafai ona ou tautala atu ai i luma o lenei Palemene, ona o lenei lava Falemai. I le tausaga ua mavae, sa le na o totonu o le Atunuu sa gaoioi ai, sa gaoioi mai foi i fafo faatasi ma totonu o le Atunuu. Ina ua maea lea galuega tele sa faafeagai ma le Itumalo, na tuu aloaia mai loa i aao o le Malo. O le sao po'o le fesoasoani lena a lenei Itumalo e tusa o galuega fai a le Malo. Peitai, tulou o le upu e to ia te au vaeatule mamalu o le Maota po'o le Matagaluega foi o lo'o faafogafoga mai, ua faaleagaina le galuega e nisi o le aufaigaluega. O lea la ua i ai nei le faaiuga ua faaletonu le falemai. O lea la sa galulue le Malo i le tausaga ua mavae atu, o lo'o ua i ai nei le galuega o lo'o faatino. O le upu moni ma le faaaloalo e mafai ona ou tautala atu ai, e le'i tuuina faa-afaafa atu faapena le falemai i aao o le Malo. Na tuuina atu ina ua malu puipuia ma lelei teuteuina faatasi ma ona totoga i aao o le Malo. O le tulaga o lo'o i ai nei ou te tautala atu ma le faaaloalo, e le'i faapea foliga o le falemai e pei ona i ai nei, e le'i atoa le tino o le falemai ma e le'i lelei foi le falemai.

Ou te talosaga atu ma le faaaloalo lau Afioga i le Fofoga Fetalai, Afioga i le Palemia, a outou Afioga i Minisita o le Kapeneta o lo'o fai outou ma faauluuluga o Matagaluega a le Malo, ia outou alofagia le talosaga se'i toe faafoi lenei falemai i le mea na fausia ai e pei o le taimi na tuuina aloaia atu ai i aao o le Malo.

O le tasi mataupu e talosagaina ai lau Afioga i le Fofoga Fetalai, ia faia se falepopo i le Itu Salega ma Palauli Sisifo e fesoasoani i mafatiaga i le tau o mai i Salelologa. Ou te tuuina atu ai ma le faaaloalo ina ia fai se falepopo mo nei Itumalo e lua ina ia faafaigofie ai felauaiga. O le Itumalo o lo'o malosia tele ai le popo ma le koko, o le aano moni lena o le talosaga.

E le gata foi i lea, ou te talosaga atu ma le faaaloalo i moli eletise. Ua le iloa le taimi, vaeatu le Maota, e oo atu ai le moli i lo matou faaitu. Se'i alofagia lau Afioga i le Minisita ia fesoasoani i le au galulue ia faavavevave mai

moli eletise ina ia faatino lea galuega lelei. O se faamatalaga lea.

A i ai foi se isi mea o le a manatua i se isi ituaso o Tualumaga o le Fono, o le a fofoga lava i ai a outou Afioga i le Kapeneta. A'o le asō ma le mataupu ua tulai mai, faafetai ma faamalo i nei Lipoti mae'ae'a ua tuuina mai. O nisi foi Lipoti ua aliali mai ma i ai se fefinauaiga, e tasi lava lo tatou faamoemoe o le Atua e fesoasoani mai i la outou tofa ma la outou moe, o le a faalelei ai mea mo tagata o le Atunuu e tusa ma o latou manaoga i mea o lo'o latou manaomia.

O se faamatalaga lea ma se fesoasoani atu e tusa ma lenei aso. Ia lagi faatafatafa lau Afioga i le Palemia, Fofoga o le Fono ma le Sui Fofoga Fetala; lagi faatafatafa i le Aiga Minisita; lagi faatafatafa ma ni tuata'afalu i le Palemene o lo'o ee nei i a outou Afioga ma le mamalu i Faleupolu, ni Tootoo taia ma ni outou fue lafo; lagi faatafatafa i le tapuaiga a Lana Afioga Mamalu O le Ao o le Malo ma le Sui Tofia; lagi faatafatafa i le paia o Aiga ma a latou Tama, o Tama ma a latou Aiga, ni tootoo taia ia Pule ma Tumua, Ituau ma Alataua, Aiga i le Tai ma le Vaa o Fonoti, Faleupolu Tofia o Samoa; lagi faatafatafa i le Aufaigaluega fita o lo'o galulue mo le soifua o Samoa ma ona tagata. E faapea foi faamanuiaga i se tasi o fonotaga a se tasi o Ekalesia o lo'o feagai ai i lenei vaiaso. Ia fesoasoani atu i la latou sailiga manuia mo Ekalesia aemaise Samoa ma ona tagata, lagi faatafatafa i Ulu o Kamupani ma Ofisa eseese o lo'o latou galulue mo le manuia o Samoa, lagi faatafatafa i le Motu i Sasae ia Tutuila ma Manua, ola ma maloloina se faamatalaga. Ia manuia.

Susuga SA'U LO'IVAO



Itumalo Faalaalafaga:

Aiga i le Tai

Filifilia:

2 Mati 1985

Faatauto:

19 Mati 1985

Lauga Faataupou:

2 Iulai 1985

Ma le faaaloalo lava, e tulai atu ai ma le ava i lau Afioga ma le mamalu o le fonotaga i lenei taeao. Ae mitamita faia'e le agaga ma le faamoemoe i lenei taeao, ina ua tauaofia le Palemene mamalu o Samoa i lona Maota i Taifau nei, i le lagi e mama ma le soifua maua, ua tuana'i foi ia fatia ua alu sa tauasa mai ai, sa taualo mai ai le vaa o Sagalala, sa leiloa pe tua mai ni a; ae peitai ua taunuu ma le manuia le vaa o Sagalala i le nuu o Ape, i le lagi e mama ma le soifua maua, o lenei ua fesilafai Samoa i lona Maota i Tiafau. Ma o le viiga sili la ma le taua i le faamoemoe i lenei taeao, faafetai ua taunuu, ua tini pao le faamoemoe o le Palemene o Samoa. Lau Afioga ma se tofa i le alii Palemia, o le aso

o le a tauaofia ai le Palemene, o le mea sili lea ona taua, ua fai ifo mai lagi ni manu.

A o lenei lava taeao, masalo e i ai foi se faitauga faapea, e fou lou tootoo ae ua vave ona ou tulai. E sao foi e fou Paulo i lea galuega, ae o le a le avea foi le fou o Paulo i le galuega, ae pasi ai se mataupu pe o se Tulafono po o se lipoti, ae le tautala i ai le Sui o le Aiga i le Tai. Peitai la, ma lou faaaloalo i lau Afioga i le Fofoga o le Fono ma le mamalu o le Palemene i lenei taeao, ona ua fetaii lou fou mai ma le tulai mai foi o le lipoti i lau Afioga ma le mamalu o le Palemene. Ua fetaii foi ma le mea e matua tiga ai lou faamoemoe ma le talafeagai ai ma lou itumalo, ma lou faaaloalo lava. O le lipoti la lea ua tulai mai, ou te matua avatu le faamalo ma le faafetai i lenei Matagaluega. O se Matagaluega ua maoae lona sogasoga ma lona maeleelega, ona o le tuuina mai o lenei lipoti. E ui ona sa i ai se faanoanoa i le taimi ua fano, ona peiseai o se fono faatoa tau fetuunai ni ao i le tofa i lau Afioga ma le mamalu o lo'o tauaofia ona o se faafitauli lea sa tulai mai, na ala ai ona tatou malolo, pei o le a tau sue mai ni lipoti. Ia o na mea, e lafo atu i lau Afioga ma le mamalu o le Ofisa, ae matua ou faafetaia i lenei taeao le matagofie o le tuuina mai o lipoti.

Lau Afioga ma le mamalu o le Fono, o se matua mea taua tele lenei mea. Ma o lau lava faalogologo mai tua i lea tausaga ma lea tausaga, o se tau vaili mai o lipoti mai lea Matagaluega ma lea Matagaluega ma ona faamaumauina. A silasila lau Afioga, o mea lava nei o lo'o tulai mai i Matagaluega eseese a le Malo, lea foi ua oo mai i lenei taeao, ou te le o vaavaai lava i sea lipoti ma sea lipoti a Matagaluega. O lea ua ou matua faafetaia ai i lea Matagaluega, ona o le mafai ona tuuina mai i luma o le Maota lenei lipoti matagofie.

Ma lou faaaloalo lava, e ao ona fautuaina lau Afioga ma le alii Minisita ua ao lava ona vaili uma mai lipoti a Matagaluega. E le se mea matagofie, tulou vae atu le tofa, lo tatou pisa, pisa iinei ae leai ni lipoti a Matagaluega taitasi. Tatou te o lava i luga o le laina, tatou te tautala tonu lava vae atu le tofa, i luga o mea tatou te vaaia. Peitai la o lea ua tulai mai, ia o lea ou te sau lava i lau laulau e leai ma se lipoti e tasi. E ao foi ona ou toe fia vaai i lipoti i ia tausaga ua mavae seia oo mai i le tausaga nei. O lea ou te matua faafetaia ai lenei Matagaluega, ona o le aumai auiliili o le lipoti. Ae afai lava o i ai se Matagaluega e le o aumaia ni lipoti i le Maota nei, aua o iinei e avatu ai. A i ai se mea faaletonu i lea Matagaluega i ni mea o misi, mea e fia faaleleia, fia maua, ma ni mea ua aveesea ona ua leaga o i i lava. Ae le mafai ona faia se faaiuga e le mamalu o le Palemene, pe a tatou le vaai ma silasila i ni lipoti a Matagaluega i lea tausaga ma lea tausaga. Ma ou te fautuaina ai lau Afioga ma le Palemene, a o i ai lava ni matagaluega e lei aumaia ni lipoti, silasila totoa lau Afioga, ua tatau ona aveese tagata ia e le o faamaoni, ulu o Matagaluega.

O lea ou te faitau atu i le itulau 1 lea, i le parakarafa pito i lalo o faapea mai - E fai mea faalogo Matagaluega

i le Minisita o Fuainumera Faamaumauina, na te fautuaina le malo i mataupu faatatau i ni galuega a Matagaluega na te aoina mai. Afai la e le o iinei lipoti a Matagaluega, e ao foi ona fesiligia ma masalomia le Minisita, pe ua faatamala ia i le aoina mai ma silasila totoa i lipoti nei, ma mea faamaumauina. O lea e fautuaina ai lau Afioga, aua o le mea lea e i ai tatou, tulou vae atu le mamalu o le Fono, na o le avatu lava o ia mea ma pasia, ia mea mo lea matagaluega ma lea matagaluega. Tuu atu loa, ona taaalo lava lea o latou, latou te le iloa ona fuafua lelei ma faautauta i le faaaluga. Lea tatou te saunoa i lea aso ma lea aso, leai ni tupe, e taugata le soifuaga, ae mafua mai i i, ona o le le silasila totoa e o lo o pulea ma faauluulu i Matagaluega i le faamaumauina o ia mea.

Ma le faaaloalo lava, ona e i ai le laina lea faapea - Fuainumera faatatau i tagata soifua ma o latou soifuaga ma isi uiga. O lau fesili la, ua oo mai le Matagaluega a le Soifua Maloloina? E fia ni tagata ua maua i le gasegase i le pefua i le auala le faataina, ma ni tagata ua maliliu i le sami?

Ma lou faaaloalo lava, i le tausaga lea sa fai ai le faaulufalega a Apolima-tai, lea sa silafia ma faafofoga uma i faalavelave tutupu ma maliliu ai tagata i le sami. O lau fesili la - Ua aumai se lipoti a lea Matagaluega ua fia ni gasegase? Aua a tatou silasila i ai i le atu Fagaloa, lea atu Aleipata e le o faataina auala; sosoo atu ai ma Mulifanua, Manono, Apolima ma Falelatai. A ou fua faatatau i ai i pasene o tagata ua maua i le gasegase, ua liloifa o latou mama vae atu le mamalu, ua ova i le miliona tagata. O le ala tonu lea ua ou fai atu ai ma lou faaaloalo lava, sei silasila totoa le Malo i lea tulaga.

Ma lou faaaloalo lava, ou te talosagaina lau Afioga a le Fofoga o le Fono, o le ala foi lea o lou toe fautuina o lau Afioga e ave ma Fofoga Fetalai, ona ua lava lau tofa ma le faafoe, e faafoeina ai. Se i e alofa sei fautuaina alii Minisita, sei onasai. O laugafoi faa-Samoa, a oo loa ina tala, ia ua faapena foi ona sosola manatu ae oo mai nisi tulaga. Ma lou faaaloalo lava, e pei o le ala lea ua ou fai atu ai. Afai ua ou fai atu le fuainumera e miliona, o lona uiga o lea ua ou faitauina ai le aofai o tagata o lo o soifua nei ma tagata e lei soifua mai mo a taeao. O lona uiga, e sau augatupulaga, e alu atu augatupulaga, o le gasegase lava lea e maua ai, o le pefu i le le faataina o auala; o nisi foi e maliliu i le sami. O le mea lea ua out u atu ai, ona e ala lava ona silasila totoa lau Afioga, e ao ona tapa uma lipoti a Matagaluega taitasi sei aumai i luma. O lea foi ou te fia fesili ai i lau Afioga i le Minisita o Falemai, sei e silasila totoa i ai. Afai e le silafia e fomai o i ai nei le gasegase o le pefu ona ua faapio ese lona mea, ou te fai atu e i ai lou poto faapitoa mo le gasegase lea o le pefu.

O le isi mea ou te fia tautala i ai, lea e taua mai i le parakarafa 2 i le tulau e 2. O lo o i ai le laina i lalo faapea - E toa 5 ni alo sikolasipi sa faafigaluega e le Matagaluega, i le taimi o a latou faiga malologa. Ma le faaaloalo i lau Afioga ma le mamalu o le Fono, o lau fesili - E faapefea la ona fai tagata faigaluega ia? O le a

le totogi o totogi ai, aua e le o faigaluega tumau? E faavaitaimi (part time) ai. O fesili na ou te fia malamalama ai, ma o lea e aumai ai lava i le lipoti, o tagata na e toa 5. Ae ou te le o malamalama, po o le a le mea o i ai totogi ma lona tulaga, pe ua toe o ese nei pe leai?

O le isi mea lau Afioga o lo o taua mai ai, o le faafitauli lava lea o lo o faifai pea. O lau fesili la ma le faaaloalo - Ua le mafai i se a ona foia ia faafitauli? Pe afai e faifai pea. O le upu leni o le faifai pea, ua masani ai lava, seia oo mai lava i le taimi leni. O lona uiga, o la lava e faifai pea le mataupu lena. O lau fesili la, - Ua le mafai i sea ona fofo le faafitauli lea, a o le a foi le fofo e fofo ai? E pei o au fesili ia e fia malamalama ai na e avatu lava ma lou agaga maulalo i lau Afioga ma le mamalu o le Fono i leni taeao, o le agaga lena o ia te au. O le agaga lena o le Sui o leni itumalo, sei silasila totoa i ai a tou Afioga i alii Minisita i mea ia. O lo o tatou pisa nei i le leai o ni tupe, a o mea ia i gasegase. E le taua le malelepe o taavale, tulou ma vaa, a o le soifua o tagata. O ai e faia le Malo? O tagata, ae a afaina le soifua o tagata e leai se Malo. Sei silasila totoa la i ai. E oo mai lava i le taimi leni, e pei o le agi o le matagi le faiga o lou auala sa i ai. O nei la, o le a le mea ua poloka ai? Ua poloka ea ona ua mamai tagata faigaluega, tulou vae atu lo outou paia, ua lavevea ea latou i le pefu pe ua gasegase i ni mai faale mafaufau.

O nai mea ia ua ou tulai atu ai ma le faaaloalo, i nai fautuaga ua tata nei ona tapa lipoti a Matagaluega taitasi mo le faamaumauina. E pei ona tulai mai le lipoti i le aso, ona o lona uiga o le Maota lava leni e maua ai mea tonu, e tuu atu ai, tuu ese ai, faamau ai ato ma lona faaleleia o mea uma. Ae afai tatou te o mai lava faapenei ma le tapa lipoti, ia lea foi ua ou tilotilo atu i le isi lipoti lea e aumai, o le 1985 leni a o le 1983 lea e aumai ai le lipoti lea o le Matagaluega. O lau fesili - Po o le a le mea e faapea mai ai? A o lea e tagi mai i lea aso ma lea aso, e le lava tagata faigaluega? E saga ave la i fea nei mau tagata faigaluega, a o lea ua oo i le '85, sau le lipoti o le '83? Ma le faaaloalo lava, afai o tulaga ia, o lona uiga tatou te oo i le 1990, ae faatoa avatu le lipoti o el 1986. O le ala lea o lou fai atu, sei silasila totoa i mea e tata ona fai. O lea foi matou te nonofo mai tua, ma matou faalogologo mai ma vaavaai mai i mea o lo o fai e lo tatou Malo mo le faaleleia o tagata soifua. E pei o le ala lea o le tulai atu, ona o mea ia e mamafa tele ia te au, ona o le mafatia tele o lou itumalo sei tau i Falelatai, i le mea lava leni o le pefu. Ae o lea lava ou te lei vaai atu i se lipoti a le falemai, o aumai ai e fia gasegase, ma lou faaaloalo laa.

Lau Afioga i le Fofoga Fetalai ma le mamalu o le Palemene, o leni aso, ia ona pau ia o nai mea ua ou manatua i leni taimi e faatatau i le lipoti lea ua aumai, ma le agaga faamalo ma le faafetai, ona ua tuuina mai leni lipoti matagoife i luma o le Maota. Ma ou te toe fautua atu ai lau Afioga, e ao ona toe saili uma mai lipoti o tausaga ua tuanai atu. A i ai Matagaluega e leai ni

lipoti e oo mai i le Maota nei, ua tataua ona i ai se faaiuga e aveese ai ia tagata, pe afai e faatamala pea i le vaaiga o meatotino a Samoa ma lona Malo. Ia faaiifo mai lagi le Agaga o le Alii e fesoasoani mai i lau Afioga i le Fofoga o le Fono aua le faatautaia o le Palemene o Samoa i lenei tolu tausaga. Ia usuaia foi e le Mana o le Alii, tofa taitasi ma faautaga loloto, ina ia tatou maua malu aua Samoa ma lona manuia mo aso o i le lumanai ma le taeao ma i e lua. Ia soifua le manuia le Fono.

Afioga TAVUI KOKI



Itumalo Faaalaalafaga:

Satupaitea

Filifilia:

1 Mati 1985

Faatauto:

19 Mati 1985

Lauga Faataupou:

5 Iulai 1985

Lau Afioga i le Fofoga Fetalai ma le mamalu o le Maota, o le faalupega o le tamaloa Satupaitea, o le Vaimalae ma le Vaiti. Le mamalu o le Palemene, ou te muamua ona ou faafetai e tusa o le tulaga e pei ona i ai. E ui lava ina ou lagona ua pau le tamaloa, ae ia avea ia au e fai ma Sui o lou itumalo i lenei lava nofoaiga.

Lau Afioga i le Fofoga Fetalai, le alii Palemia ma alii Minisita faapea Sui mamalu o le Maota, ou te faafetai atu. E pei ona faitau atu i le lauga faalautele a le alii Palemia e tusa ai o mataupu faaalua, ona o tulaga atiina ae ma fuafuaga e pei ona i ai i lenei vaitaimi. I lau tilotilo atu i le saunoaga a le Palemia i atiina ae o auala, e avatu ai lau talosaga i lenei lava itumalo o Satupaitea, ua faalelei uma auala ma fuafuaga, a o lenei itumalo e pei ona i ai fuafuaga a nisi nofoaiga ua mavae, e fia faataina lumafale o falemai. A o lenei lava itumalo e pei ona avatu e isi uso a Faipule muamua, ia le talosaga lava lenei ona o le auala o lenei itumalo, ua sili ona le manuia vae atu le Maota. O lea ou te talosaga atu ai e pei ona taua i le lauga faalautele a le Palemia, o atiina ae ina ia faalelei, e talosaga atu ai, ina sei alofagia sei fesoasoani atu i le auala o lenei itumalo, aemaise foi o le falemai. O le puipuiga foi o le soifuaga, ina ia lelei aua le soifua maloloina o tagata. O lenei lava falemai, a silasila se tasi i ai, a oo ina tulai mai tulaga ua la, o se faafitauli tele lea i totonu o le matou falemai ona o le pefu tele. O lea la ua ou tilotilo atu i le saunoaga, e auala atu ai le talosaga. O le isi itu ou te fia molimoli atu i le alii Minisita o le Soifua Maloloina, ina sei silasila i le falemai o lenei itumalo, ua matautia le faaleagaina, ua leaga apa ma tutulu vae atu le Maota, o tulaga lava ia e avatu ai ni fautuaga i le Malo o tulai mai, sei silasila ma alofagia e tusa ai o ia faafitauli.

I lau tilotilo atu i le isi itu lea, o le atiina ae o vaa o le sami. Ia e muamua ona faafetai i le alii Minisita e tusa o le fuafuaga e pei ona i ai le faaleleiga o femalagaiga o

Savaai ma Upolu. Ae paga lea, i lau faalogo i le 2AP i se tasi po, ua agai atu le tatou vaa e pei ona aumai e malaga agai i Tutuila. Ae silasila foi lau Afioga i le Sui Palemia ma le Malo, i vaa uma lava o tulai mai i le Malo o Samoa ma faataunuu mai i totonu, o lo o umusaina lava i Savaii. Ae e uma ona umusa i Savaii, ae tei emo ane le ata, ua alu agai i Tutuila. O le ala lea, sei alofa le alii Palemia aua sa faafiafiaina foi o matou Sui mai le motu tele i Salafai, ona ua matagofie le aula e feoai ai, a o lea foi ua toe tilotilo atu ua agai foi i le Malo Tele i Tutuila lo tatou vaa. O nai fautuaga ia e avatu i le Malo e tusa ai o na tulaga.

O le isi mea ou te fia tautala agai i ai, o le fale-popo lea i Salelologa. I le Minisita o lo o i ai nei, sei silasila totoa i le faafitauli o lo o i ai i lea fale-popo, e avatu ai se talosaga pe lei mafai ea ona avatu se fua i tele i Savaii? Aua a fuafua atu i lau matau i ai, o Savaii o lo o malosai mai ai le atiina ae o le popo ma le koko. Ae a silasila le alii Minisita, pe a mata mai i le aso Gafua seia oo ina uma le vaiaso, afai na e usu mai i le taeao i le 8.00, e ta le 12 po le 1.00 faatoa mafai ona malaga ese mai le fale-popo. Ona o le tele o faafitauli o i ai e le lava mea faigaluega o lo o i ai e faafoia ai ia faafitauli. A silasila i ai lau Afioga i le alii Minisita i lea lava faafitauli, a oo ina tulai mai i aso timu, ia tasi lea faafitauli e tulai mai ai i popo. O lea e avatu ai se talosaga i le alii Palemia ma le Malo, pe lei mafai ea ona avatu se fua tele i Savaii, ina ia faafoia ai le faafitauli o lo o tulai mai pea i le fale-popo i Salafai. Ia o nisi na o manatu e fia avatau ona o tulaga o faafitauli. A o le mea lava lea e talosaga atu ai i le Malo, sei alofagia lo tatou vaa, ia faaauau pea tulaga manaomia ia alu atu pea le vaa i Savaii ae aua le avea i Tutuila.

Ia o nai manatu ia o le Sui, e momoli atu ai i luma o lenei Maota mamalu. E faamalulu atu foi afai ua i ai se gagana ua sala, ia faamalulu atu ona o le Sui fou. Ia manuia le Fono.

Tofa TIMU LAFAELE TIMU



Itumalo Faaalaalafaga:

Gagaifomauga Nu.1

Filifilia:

1 Mati 1985

Faatauto:

19 Mati 1985

Lauga Faataupou:

4 Iulai 1985

Faafetai mo le avanoa. Atonu sa foufou foi le vaa o le sui nei, pe alu pe taofi. Ae ui o lea, atonu ua sisila le Atua i lou mafatiaga ua mafua ai lou tulai atu.

Ia le paia e, o le Maota ou te le alu loa. O le saunoaga malele a le afioga i le alii Palemia ua fitoitonu iai lenei taimi, o a tatou galuega, ia atonu o lea ua i lumamea o le Laulau-a-fono. Maou te le faatamala la iai, o lea ua tuu lelei i ou luma ona o lou faaaloalo i le saunoaga. O se

taimi ona agai atu lea iai o se manatu vaivai. Ia a o le paia o lenei taeao i le Maota o Samoa, e ao lava ina ou faapai atu, e le faaopoopoa sa o le Maota, pe faaopoopoa foi faigata o Samoa aemaise le Atua ma lona finagalo. Ae ou te faapea atu ma lou faaaloalo. Le paia o le Fono, lau afioga i le tama a le Malo, le afioga i le Palemia le paia o le Kapeneta o le aiga Minisita, le maualuga o Sui Usufono o lenei Palemene aua le nofo o itumalo e fia o le Malo o Samoa i Sisifo, ma lana faiga Malo. I le maualuga o Sui filifilia, i alii Faipule ua tofia mai i uso a palota taitoatasi, ia o le paia lea o le Maota.

O le paia aua le tapuaiga o lo o tapuai tatalo mai, aua le aoao o le aufaigaluega paia o le Atua. Le maualuga oo-oo aua le tapuaiga a le afioga i le Ao Mamalu o le Malo, le Susuga i le Tapaau Faasisina, le Susuga i le Malietoa. Le Tapuaiga a le Tama-a-Aiga, le Sui a Fono o Sui Tofia. Le maualuga aua Tama ma Aiga, Aiga ma Tama, Tumua ma Pule, Ituaa ma Alataua Aiga i le Tai ma le Vaa o Fonoti. Ia ae tainane paia maualuga aua le nofo a Ulu o Matagaluega eseese a lo tatou Faiga Malo, i e o lo o taitaia tupu ma ee o Samoa, tama fanau a Samoa o lo o galulue ma tauasu le vai o le soifua faaletino, aua lenei Malo Tutoatasi. Le tapuaiga aua le aufai-faatoaga, o e o lo o latou taumafai le fatu o le tamaoiga o Samoa, ia o ou paia ia. Ou te manatu ai, ou te oo atu ai aua outou paia maualuga Samoa ma le Maota. Ia ma o le a ou le tuulafoaina i lou avanoa, lou fia pai atu aua le mamalu o le itumalo, ua mafua ai ona ou nofo atu i lo latou nofoa, e le soona nofoia e se tasi o lenei itumalo, Gagaifomauga Nu. 1 Safotu ma Manase. Ia le paia e i le itumalo aua le paia i sao e fa, le falefa o le aiga o Sa Umalau, le mamalu i le tofa i le tulafale le Ati Pouniu ma le Faasau aemaise le nofo o ituaiga i fale Safotu. E maualuga aua le fetalaiga i le alii o le Itu, ae faapea foi le paia aua le afioga ia Taito ma le mamalu i Aiga aemaise le fetalaiga o le Tauasa. Ia atonu o le paia lena o le tatou itumalo o lo o tatou sapi ai nei i le Maota o Samoa, ae tainane le mataitu mai o le aoao o le atunuu. Ae le gata i lea, lo outou mamalu lena o lo o tautua ai le galuega paia a le Atua aua le lagi o lo o faatalitali iai.

Ona ou faapea lea le paia e i le Fofoga o le Fono ma le mamalu o lenei Palemene, le tapuaiga aoao aua le Aufaigaluega Paia a le Atua, le mamalu i le tapuaiga aoao o Samoa aemaise le itumalo e faapelepele i ai lou leo. Ia o le a taumafai atu ia se sao o Tumanuvao aua lenei taimi ma le avanoa. Ia ae ou te faapenei atu, e ui lava ina e lei see atu le vaa i se fuafuaga vaivai ma le fia taumafai, ia ae ou te avatu le vai malu i puega, lau afioga i le Fofoga o le Fono, le o loo faamuamua iai le filemu moni o lenei Maota, faapea foi i le alii Palemia, le Kapeneta ma le mamalu o Sui Usufono o le Palemene ma le aufaafogafoga, aemaise le tatou Itumalo Gagaifomauga Nu.1. O le a foi se sao o le tatou itumalo o le a taumafai iai, ia e pei foi ona fai mai se tasi o Sui Usufono i le aso ananafi, ia e fou foi Paulo i le galuega faale-agaga. Ia e faapena foi ona ou fou i galuega faale-Malo, ua outou faaeeina i lou sui.

I le saunoaga lenei a le alii Palemia, ma o le manatu vaivai, ua uma ona iloilo totoa lenei Maota i le tele o lipoti e ala mai Matagaluega o le faiga Malo, ma e faafetai tele i lea tulaga. O le ala foi lea sa le mafai ai se leo, ona e sili lou faamoemoe i lou lava talitonuga aua le saunoaga malele a le Taitai o le Sa o Samoa i le 1985. Ia o lea la ua iai se lagona, lau afioga i le alii Palemia ma le mamalu o le Kapeneta o le a sau faafofogaaga o le a paopapa se leo, ia o le gagana e vaivai. A o le lagona o le loto e pei ona silafia e le Atua, o le fia tau mai se fua manogi, se fua matala o lenei itumalo e fatu ai lo'u pale, fatu ai le titi o le Kapeneta, ia tainane lenei Maota ma le mamalu o le atunuu.

O le aoao o le saunoaga a le alii Palemia, ou te momoli atu le faafetai. Faafetai i le saunoaga, sa ou matauina sa le faatamala lau afioga i le sauniga o lenei saunoaga. E aliali mai i le tulaga aoao o lo o iai i totonu, e leai se mea o faaletonu. Ae pau o lea, e ao lava ona avatu pea se motuga-afa o lou sui e lagolago ai i le saunoaga. O le matauina la i le Pepa 3 o le saunoaga, [e] o lo o faapea mai ai se faaupuga o lau saunoaga, o se saunoaga e matua faatauaaina. Ina ua oo iai le saunoaga, sa lagona lava i tino matagi lelei, aua ua le maalofia le tofa i lau afioga, ae ua aumai malamalama i luma o lenei Palemene. O lo o iai la le faitauga faapea- O tupe soona faaalu. O le matua lea o lo o lagolago i le saunoaga, o tupe soona faaalu. O lo o i le Nu.3 (e) o le saunoaga. Ia a ou manatu la i upu ua tuuina i le saunoaga 'Tupe soona Faaalu' ona ou manatu ai lea i le taofi vaivai, ua uma ona tupu le mea. O ananafi, ua uma ona faaalu le tupe soona faaalu, o nei ua iai. Ia ae pau lea o le mea, atonu ua aumai aloaia e lau afioga i luma o lau saunoaga, ua ao ona avatu se fautuaga. Afai foi o le a le silasila a lau afioga e sese le faauigaina o le sui, ia malu ma ia le avea i fale e pei ona talosaga atu. O le tupe soona faaalu i lou lagona, ia atonu e fiu Matagaluega a le Malo e tau saili se fofo i le gasegase o lo o gasegase ai Samoa. Aisea? O lea Matagaluega o taumafai alii Minisita ma Ulu o Matagaluega faapea le mamalu o le atunuu i taumafaiga eseese e auala mai i lona tamaoiga, a o lea o lo o tau manino mai ai le faafetai atu a le alii Palemia i tupe soona faaalu. Ia o le a la le mea o le a mafai e le sa o Samoa? O ananafi sa iloa ai se mea sa tupu, leai se fofo. Ia atonu la o lea atugalua ai le taofi i le lagona faa-sui i le lagona i le alofa i le alofa, leai o le alofa lea ua ala ai ona tuuina mai le mataupu i totonu o le Fono.

E avatu ai la se fautuaga ma se talosaga e lagolago ai lau afioga, aisea ea ua le fai ai se fofo i lenei tupe soona faaalu? Aua e tele lava ni faauigaina o le upu, tupe soona fai, soona ave i se tasi ae leai se tasi e lafo iai lenei matafaioi. E lafo atu lava i le alii Palemia ma le Malo. Ia o le mea lena e nutimomoia ai le loto ma le agaga. Ua silafia foi e le Atua lou faatuatua ua vaivai ane, aisea? Ona o tupe soona faaalu e Samoa i Sisifo, le atunuu laitiiti ma utiuti ona tagata ae ua taugata lona soifuaga. E mafua i se a? O tupe soona faaalu, o le matua o lau tautalaga.

Saunoaga Faataupou a Sui Usufono 2001-2011

O lea la e tatalo atu ai i lau afioga i le alii Palemia, o le a ea se vai fofo? O lea foi ou te faitau i se tasi o au saunoaga lau afioga, i le tulaga o tupe autu, o lo o taua ai le Faalapotopotoga a le Esetete Tausi; o lo o faapea mai ai se tasi o faitau matagofie i le saunoaga a lau afioga, e faasino i le lumanai. O le a taumafai atili. O lona uiga i le faauigaina, e leai se taumafaiga atili ma se taumafaiga lelei, atili ananafi, lea o lo o pologa ai nei le atunuu. Ia ae pe mafua i se a ona leai se fofo? E pei ona ou fai atu i le tupe soona faaalu, ia o lau fesili o le a tulai i lau afioga. E mafua ea isea ona soona faaalu, a o lena e talitonu Samoa, o tupe soona faaoga o le sene, e liliu le tofa i lau afioga ma le mamalu o le Kapeneta ona faatoa faaoga ai lea o se sene. Ia a fua la i le tatou soifuaga o iai nei, ia e ofo ai lava. O le tuanai, ua leva ona faaoga ma leva ona mama le sa o Samoa. Ia o le a se mea o le a iai i lenei taimi ma a taeao? E na o se fesoasoani matou te lafo atu i lau afioga i le alii Palemia ma le mamalu o le Kapeneta, ina ia tulai mai se tulaga lelei. Ae o le a le tuua ai le fesili lau afioga. O le fesili muamua, e mafua i se a ona faaoga ma le soona faaalu le tupe? Lona lua, o ai foi o soona faaogaina ia tupe? Ia o se tasi o au fesili e tolu ai fesili lau afioga o sau ea ia ituaiga tupe i le Tala o le Tupe faaalu a le Malo i lea tausaga ma lea tausaga, ua mafua ai le soona faaoga ai a tatou tupe? Ia o fesili ia e 3 e tuuina atu i lau afioga, ona o lou fia malamalama. A ou malamalama, ua faigofie foi i lou lagona. Ae afai e tuuina atu nei, o se fautuaga e aoga mo le lumanai o Samoa, ia o lena ua ou fai atu. Tatou te galulue fua i le tovine ua tuuina mai e le Atua tatou te galulue ai, o Samoa i Sisifo lea, le vaega lea o le tovine a Samoa. E tatou te fiu lava e taumafai, lafo mai ma taumafai mai le faifaatoaga, taumafai mai le faifaiva ma matafaioi o punavai ola o le atunuu, ae tatou te galulue fua lava. Ona o lo o iai la le pu lea o lo o taua mai i le saunoaga a le alii Palemia.

O le mea lea ou te ofo i le alii Palemia i le loto tele, faafetai i lou alo lau afioga Tofilau Eti Alesana le Sili, mo lenei tolu tausaga. E leitioa ona o le lelei o le suafa ua e maua, o le suafa mo le lelei mo le lumanai o le atunuu, ona o lau amiotonu ua tuuina mai ai lenei faaupuga i le lipoti. Ia o lea ua avatu ai lau fautuaga, e fautua atu ai, ia faapena. Ia ona faataga ai lea o se manatu i le tulaga i le saunoaga a le alii Palemia. Ia ae ou te faapea, ua ou lagona lava o le taimi lava lenei e tuuina atu ai talosaga, e auala lava i luga o le lipoti a le Palemia aua le tamaoaiga mo a taeao o Samoa.

Ia o tulaga foi, seia faafofoga mai foi lo matou itumalo, ina nei faapea po o a galuega a le Faipule o fai. Ona ou faapea lea, i Afioga i alii Minisita, o tulaga i galuega i alagalue, falemai, o se telefoni, pole fagota ma mea faapena, ia o tulaga aoao na ua uma ona ou tusitusia aloaia o talosaga a lenei itumalo ma tuu atu i a outou afioga aua le lumanai o lenei itumalo. E na ona talosaga atu faapena i luma o lenei Maota. Ia atonu o se matou lagona lea i lenei taimi. Ia ae ou te faafetai mo le avanoa o lou sui ua ou tulai atu ai, ona o nisi na o mea o lo o ua

faaali atu. O le a lava se tatou galuega i lenei tolu tausaga, tatou taumafai i le mea sili e ao ona fai. Ae fautua atu mo le le lelei o se fofo o le tupe soona faaalu ma faaoga.

Ia ua faaiu so matou leo, ia lagolago mai le Atua i lenei fonotaga mamalu. Ia manuia lau Afioga i le alii Palemia ma lau Kapeneta faapea i Sui Usufono mamalu o lenei Palemene. Ia alofagia foi le tapuaiga a le Ao mamalu o le Malo, faapea le Sui mamalu a Sui Tofia, faapea le aoao o le tapuaiga a le Auaigaluega Paia a le Atua ma Samoa aoao. Ia soifua maua le Itumalo Gagaifomauga Nu.1 ae ola le auauna. Soifua.
